

ROMAQ

Pê Chyáng Hun Kat é Laiká (Romans)

¹ Hkrisduq Yesuq é dui-nhâng zoshâng eq lagyo dut râ matú, Garai Gasâng èq ji yu é hui luí, chyoiyúng Chyúmdang pé má, ² Garai Gasang gi, hí hí mai Yhâng é myiqhtoí pé dông danggidiq byí to bê nghut é, Yhâng é Yuqzô é hkyô nghut é, Garai Gasâng é gabú danglu é matú hkyin to huí é sù, ngò Poluq gi, Romaq myuq má nyi é, Garai Gasâng èq chyitdap é hui luí, sân-yúng bang dut râ matú jì yu é bang banshoq lé, dang kyô kat lhê. ³ Yhâng é Yuqzo haú gi, byù hkyam dông ga jáng, Dawiq é awut ashín nghut ri; ⁴ Yhang gi, shi é mai dum dui toq é dông, Garai Gasâng é Yhangzo nghut é hkyô lé, chyoiyúng hkyo é Woi-nyí dông mai, hpungwup a-tsâm èq sé nhâng bê nghut ri. Yhang gi, nga-nhông é Yhumsîng Yesuq Hkrisduq nghut ri. ⁵ Yhang dông mai le, Yhâng myîng é matú le, ngamoq gi, byù myû chângjup mai byù ji yù mù, lumjîng hkyô lé châng nyi nhâng râ matú, jeju eq lagyo ayá lé wó hkam yù bê nghut lhê. ⁶ Nungmoq le, Yesuq Hkrisduq eq séng râ matú ji yù huí é bang má lòm bekô nghut ri.

⁷ Nga-nhúng é Îwa Garai Gasang eq Yhumsîng Yesuq Hkrisduq chyáng mâ é jeju eq nguîngón hkyô gi, nungmoq chyáng ru joq nyí sháng gaq ô!

Poluq, Romaq Myuq Má Ló Kum Nau É Hkyô

⁸ Nungmoq é lumjîng hkyô lé, mingkan gón má taí pyo ló bê nghut é yanmai, sân-hi má, ngò gi, Yesuq Hkrisduq é myîng mai, nungmoq banshoq bâng é matú, ngá é Garai

Gasang lé, jeju hkya-on lhê. ⁹ Ngá é kyûdung dang pé má, ngò, nungmoq lé hkâ-nhám le bûn nyi é hkyô lé, Yhâng é Yuqzô é hkyô gabú danglù lé hko kyô nyi é má, ngá é myit nhiklhum banshoq eq dojaú é Garai Gasang gi, ngá é saksé nghut lhê; ¹⁰ Garai Gasang ô nau é nghut jáng, hkâ-í a myáng má, ngò, nungmoq chyáng wó jé lé râ hkyô htong byi râ matú, ahkuî, ngò kyûdûng lhê.

¹¹ Ngò gi, nungmoq lé, woi-nyí hkyô eq sêng é chyunghuq wó gâm byi mù, nungmoq lé wum-o wó lhoq kíng byi râ matú, nungmoq lé gyai yhang myàng nau nyi ri. ¹² Haû su nghu é gi, nga-nhúng rayuq eq rayuq é lumjínng hkyô dông mai, nungmoq eq ngò, myit wum byí é hui râ matú nghut lhê. ¹³ Gumang wui ê, ngò gi, haû tûngbaù pê chyáng mai ashi wó yu é eq rajung za, nungmoq chyáng mai le ashi wó yû râ matú, nungmoq chyáng lé jé râ nghû adàm dàm dâ wú é nghut kôlhang, ahkuî jé shoq hkûm tang pyám huí é hkyô lé, nungmoq lé sé nhâng nau ri.

¹⁴ Ngò gi, Grik pé lé le, Grik a nghut bang lé le, hpaqchyí bò bang lé le, hpaqchyí a bò bang lé le, chyîn dap to sù nghut lhê. ¹⁵ Haû nghut é yanmai, ngò gi, Romaq myuq mâ é bang nungmoq lé le, haû gabú danglù gyai yhang hko kyo nau nyi é nghut lhê.

¹⁶ Haû gabú danglù hkyô má, ngò gi, a hoq é nghut lhê; hkâsu mù gâ le, haû gi, sâng-hi má Yudaq byu pé, hau htâng tûngbaù pé má, lumjínng é sù yuq hkangmó lé hkyi yu é wó hui nhâng râ nghut é, Garai Gasâng é hpungwup a-tsam nghut lhê. ¹⁷ Hkâsu mù gâ le, lumjínng myit mai wó yû luî, lumjínng myit má gîng nyi é, Garai Gasâng chyáng mâ é dingmán hkyô lé gi, gabú danglù haú má hpông shit bê nghut ri. Haû gi, "Haû dingmán sù gi, lumjínng myit mai asak duì râ nghut lhê." ☆ ga kê tô é eq rajung za nghut ri.

☆ 1:17 Hbk 2:4

Xângzo Byu Pê Htoq Má Garai Nhkmo-yô É Hkyô

¹⁸ Haû tengmán hkyô lé, yhumsing é agè ashop hkyo èq zik hkûm pyâm é byu pê é agè ashop hkyô eq garai a bo é hkyô pé banshoq htoq má, mauhkûng mai Garai Gasâng é nhikmo-yo hkyô lé hpông shit bê nghut ri. ¹⁹ Haî mù gà le, Garai Gasang gi, Yhang eq sêng é hkyô, yhangmoq lé san za tûn shit bê nghut é yanmai, Garai Gasang lé sé âng é hkyô gi, yhangmoq chyáng san za dut bê nghut ri. ²⁰ Hkâsu mù gà le, mau htoq xâng hkun mai, hpan tô é zè pé lé wú jáng, Yhâng é a byu-myang é isâm nghut é, ahtum abyuq é hpungwup a-tsam eq Garaî é myit sâmlai lé gi, san za wó myâng, wó sê gyô é nghut lhê. Haû mù luî, byu pé gi, mara mai wó he lut râ hkyô a joq lo nghut ri.

²¹ Haî mù gà le, yhangmoq gi, Garai Gasang lé sê to kôlhang, Yhang lé Garaî dông a shigyaú kô é eq, jeju a hkya-on kó nghut ri; yhangmoq myit é hkyô pé gi, akôm dut byuq é eq, nhik a gyîng é yhangmoq é myit nhiklhum gi, chut byuq bê nghut ri. ²² Yhangmoq gi, hpaqchyî bò bang nghut lhê ga kôlhang, a-ngok é bang dut byuq bekô nghut ri. ²³ Haû mù, htên byoq a sê é Garaî Gasâng é hpungwup shing kang lé, htên byoq sê é byù zòng, nghoq lhô, dusak lhô eq yê jung dusak lhô pê èq, htaî lhik pyám bekô nghut ri.

²⁴ Hau é yanmai, Garai Gasang gi, yhangmoq é gungdu lé rayuq eq rayuq hpau a tap lhum kó râ matú, a sansêng é gungsho zùm-yap hkyô kut râ nghut é, yhangmoq é yut yut ô nau é i-myt má, yhangmoq lé ap pyám bê nghut ri. ²⁵ Yhangmoq gi, haû Garaî Gasâng é tengmán hkyô lé, mhaû é hkyo èq htaî lhik pyám kômù, hpân Sû lé noqkuq dojaú râ malaî, mhaú hkyô nghut é hpan tô é zè pé lé noqkuq mù, dojaú akô nghut ri. Hpân Sû haû gi, ahtum abyuq hkya-on hui sù nghut ri. Amen.

²⁶ Haû nghut é yanmai, Garai Gasang gi, yhangmoq lé, ahoq ahî é yut yut ô naù hkyô má ap pyám bê nghut ri. Yhangmoq é myiwe wùi lháng gi, htông akying lé tô pyám kômù, haû eq shai é đông htaî lhik pyám nyi akô nghut ri. ²⁷ Haû eq rajung za, yuqgè wùi le, myiwe wùi eq zum é htông akying lé tô pyám kômù, rayuq eq rayuq, myi su nyé shoq yut yut ô nau lhum kômù, yuqgè yhangchang rayuq eq rayuq agot a-û hkyô kut shut lhum kôluí, yhangmoq kut shut é eq gingdán é yubak dam lé, yhumsing gùng yhumsing hkam yù nyi bekô nghut ri.

²⁸ Hau htoq agó, haû Garai Gasang lé sê é hkyô gi, akyû bo é a nghut ga yhangmoq myit yù kô é yanmai, a kut âng é hkyô kut nhâng râ matú, Garai Gasang gi, yhangmoq lé, htên byoq sê é myit má ap pyám é nghut lhê. ²⁹ Yhangmoq gi, agè agáu hkyô ajung jung, agè ashop hkyô, myoqnoq hkyô eq a jú lhùm é hkyô pé byíng jup tô é bang dut bekô nghut ri; manon é, byù sat é, mabyoq jishùm htoq é, mhaú zô é eq myit goí bo é pé le byíng bum ri. ³⁰ Yhangmoq gi, lumu é bang, gansang é bang, Garai lé a jú é bang, byù rhoi é bang, nghutbùn é bang, gyáng é bang, agè ashop kut râ hkyô lhoq htoq é bang, mó wui é jìno a gyô é bang nghut akô. ³¹ Yhangmoq gi, a gying a hâng é bang, gidiq a zung é bang, chyt myit a bo é bang, shogyo nhikmyin a sê é bang nghut akô. ³² Haú pé lé kut é bang gi, shî gíng lhê gâ é, Garai Gasang é dingmán tarâ joq é lé, yhangmoq sê to kôlhang, haú pé lé, yhangmoq xoq kut nyi kô é htoq agó, haú hkyô lé kut é bang lé le, hkya-on waq toq akô nghut ri.

2

Garai Gasang Tarâ Jéyáng É Hkyô

¹ Haû mù luí, góyuq lé tarâ jéyáng é sù nàng ê, nàng gi, mara mai wó he lut râ hkyô a joq lo; hkâsu mù gâ le, nàng

yhang jéyáng nyî luî, mô haú pé lé, nàng kut nyi é yanmai, byù góbang lé jéyáng é hkûn, náng gûng nàng mara byî nyî bê nghut ri. ² Haú đông kut nyi é bang lé, Garai Gasang gi, tengmán é đông tarâ jéyáng é lé, nga-nhúng sê nyi lê. ³ Haú mù, byù za nghut to luî, góbang lé gi, jéyáng mù, yhumsîng gi, haú đông roq châng kut nyi é sù nàng ê, nàng gi, Garai Gasâng é tarâ jéyáng hkyô mai wó hfang lut râ su ngam nyi lê lú? ⁴ Haú a nghut jáng, nàng gi, Garai Gasâng é ge é hkyô eq nang lé myit wó shuî lhing nhang é lé a sê é za, Yhâng é agùn agó é ge é hkyô lé le, myit hing é hkyô eq jân shirang é hkyô lé le, wú tiq pyâm nyi lê lú?

⁵ Nghut kôlhang, náng é myit htân hkyô eq myit a lhing é nhiklhum é yanmai, haú Garai Gasang dingmán é đông tarâ jéyáng shit râ nghut é, Yhâng é nhikmo-yô é buinyî má hkâm zo râ nhikmo-yo hkyô lé, yhumsing gùng yhang hkong tô nyî bê nghut ri. ⁶ Garai Gasang gi, yuq hfangmó lé, ó le ó kut é má châng luî, hkâm zo nhâng râ nghut lê. ⁷ Jân shirâng mù, ge é hkyô kut nyi é đông, hfangwup shingfang lé le, aróng eq htên byoq a sê é hkyô lé le, ho é bang lé, Yhang gi, ahtum abyuq é asak byi râ nghut lê. ⁸ Nghut kôlhang, haú yhumsing wuizat hkyô za hô luî, tengmán hkyô lé he-ngik pyám mù, agè ashop hkyô lé châng bâng é matú gi, nhikmo-yo hkyô eq nhikjum yo hkyô jé râ nghut lê. ⁹ Wuîhke hkyô eq iyon yon hkyô gi, agè ashop kut é xângzo byù yuq hfangmó chyáng jé râ nghut lê; sâng-hi má Yudaq byu pê chyáng jé mù, tûngbau pê chyáng le jé râ nghut lê. ¹⁰ Nghut kôlhang, hfangwup shingfang, aróng eq nguingón hkyô gi, haú ge é hkyô kut é bang yuq hfangmó chyáng jé râ nghut lê: sâng-hi má Yudaq byu pê chyáng jé mù, tûngbau pê chyáng le jé râ nghut lê. ¹¹ Hkâsu mù gâ le, Garai Gasang gi, myoqdong a hkyin é Sù nghut lê.

¹² Haú jep é tarâ lé a sê é mara kut shut é bang

lhunglhang gi, jep é tarâ dông a nghut é za htên byoq kó râ nghut lhê. Haù jep é tarâ hkaù má mara kut shut é bang lhunglhang gi, jep é tarâ dông jéyáng é hui zo kó râ nghut lhê.* ¹³ Hkâsu mù gâ le, haù jep é tarâ lé wó gyô é bang lé, Garai Gasâng é hí má dingmán bang gâ é a nghut é za, jep é tarâ lé châng kut é bang za sheq, dingmán bang gâ é hui râ nghut lhê. ¹⁴ Haù jep é tarâ lé a wó é tungbaù pé gi, jep é tarâ hkyô lé, yhang baú yhang châng nyi kô é hkûn, jep é tarâ lé a wó kôlhang, yhumsing gùng yhumsing é matú tarâ dut bekô nghut ri. ¹⁵ Yhangmoq gi, haù jep é tarâ hkyô pé lé, yhangmoq é i-myt unghkaù má kâ to bê nghut é lé, tûn shit bekô nghut mù, yhangmoq é myit má hkâm zô é hkyô le, haù lé saksé hkâm byi nyi é eq, yhangmoq myit é hkyô gi, ahkuì mara hun kat, ahkuì mara hkyut kat kut nyi ri. ¹⁶ Haù hkyô gi, ngò taì pyo é gabú danglù eq rajung za, byu pê é zaú nghop tô é hkyô pé lé, Hkrisduq Yesuq dông mai Garai Gasâng èq tarâ jéyáng é buinyi má dut râ nghut lhê.

Yudaq Byu Pé Eq Jep É Tarâ

¹⁷ Nghut kôlhang, nàng gi, náng gûng nàng Yudaq byù rayuq nghut lhê ga mù, haù jep é tarâ lé lumhkau nyi é eq Garai Gasang lé xoq é hkyô má nghutbûn nyi é sù; ¹⁸ Yhâng ô nau é hkyô lé sê é eq haù jep é tarâ mhoqshit é hkyô wó yû bê nghut é yanmai, je ahkyak é hkyô lé sê gàm hkoq é sù; ¹⁹ haù jep é tarâ má, hpaqchyì eq tengmán hkýo é alik wó sù nghut é yanmai, haù myoqjit bâng é matú hkyô-u shê sù eq mauchut hkaù mâ é bâng é matú maubó nghut sù; ²⁰ byù ngok pé lé mhoqshit sù eq zoshâng wui é sará nghut sù nghut é lé, sê gyô to sù nghut é nghut le gi, ²¹ nàng, góbang lé mhoq byi sù nhîng, yhumsing gùng

* ^{2:12} Haù jep é tarâ lé a sê bang gâ é gi, tungbaù pé lé gâ é nghut luí, haù jep é tarâ hkaù má é bang gâ é gi, Yudaq byu pé lé gâ é nghut lhê.

yhumsîng a mhoq yû lhu? A wó hkau ga hko taí luî nhîng, nàng gi, hkaû lhê a nghut lhu? ²² Su-myi sulàng lú hkyô a wó kut ga byu pé lé taí luî nhîng, nàng gi, su-myi sulàng lú hkyô kut lhê a nghut lhu? Hparà lhô lé a jú dik sù nàng gi, noqkuq yhûm lé hpyoq zo hpyoq shuq nyi lhê a nghut lhu? ²³ Jep é tarâ eq séng luî nghutbun sù nàng gi, haû jep é tarâ lé lu laí é dông, Garai Gasang lé a hkungga kut lhê a nghut lhu? ²⁴ Haû gi, "Garai Gasâng é myîng gi, nungmoq é yanmai, tungbaù pè chyáng lhoq hpoí pyâm é huî ri."☆ ga kê tô é eq rajung za nghut ri.

²⁵ Haû jep é tarâ lé nàng châng é nghut jáng, ahpyo-kuq hpyit hkyô gi, akyû bò bê nghut ri. Nghut kôlhang, nàng, jep é tarâ lé lu laí é nghut jáng, a hpyit é eq rajung za dut bê nghut ri. ²⁶ Ahpyo-kuq a hpyit kôlhang, jep é tarâ hkyô pé lé châng é bang lé gi, ahpyo-kuq hpyit bê bang dông ge són byi lhê a nghut kó lhu? ²⁷ Kê tô é tarâ lé wó mù, ahpyo-kuq hpyit hkam to gù nghut é, tarâ lu laí é sù nàng lé, gungsho má ahpyo-kuq a hpyit kôlhang, jep é tarâ lé châng é sù gi, mara hûn râ nghut lhê.

²⁸ Hkâsu mù gâ le, shinggan má za Yudaq byù nghut é sù gi, Yudaq byù kyîng a nghut; gungsho má za ahpyo-kuq hpyit é gi, ahpyo-kuq hpyit kyîng a nghut. ²⁹ Ahte myit hkaû má Yudaq byù nghut sù za, Yudaq byù kyîng nghut lhê. Kê tô é tarâ dông a nghut é za, Woi-nyí èq myit má ahpyo-kuq hpyit é gi, ahpyo-kuq hpyit kyîng nghut bê. Haú yuq é hkya-on kungtôn hkyô gi, byù mai lo é a nghut, Garai mai lo é ru nghut lhê.

3

Garai É Lhumzui Hkyô

¹ Haú dông ga jang, Yudaq byù rayuq dut nyi é gi, hai akyû hkâm zo râ lhu? Ahpyo-kuq hpyit hkyô gi, hai akyû

☆ 2:24 Esai 52:5

bò râ lúhú? ² Hkyô hkgangmó má gyai akyû bò lhê! Je hí má gi, haû Garai Gasâng é mungdang lé yhang, yhangmoq lé ap byi bê nghut ri.

³ Yhangmoq mâ é ra-am lumjínq myit a bo é nghut le gi, hkâsu kó lúhú? Yhangmoq lumjínq myit a bo é yanmai, Garai Gasâng é lhumzui hkyô lé akyû a bò nhâng wó dut râ lúhú? ⁴ Hká dông le a wó dut!

"Haû mù, nàng dang taí é hkûn, dingmán é hkyô wó lhoq htoq râ eq,

nàng jéyáng huí é hkûn, ûng râ nghut lhê."☆

ga kê tô é eq rajung za, byù yuq hkgangmó gi, byù-mhaú dut kôlhang, Garai Gasang gi, tengmán nyí sháng gaq.

⁵ Nghut kôlhang, nga-nhúng é a dingmán hkyô gi, Garai Gasâng é dingmán hkyô lé san za je lhoq htoq shit é nghut lhê; haû nghut jáng, nga-nhúng hkâsu nghû taí râ lúhú? Nga-nhúng lé Garai Gasang nhikmo-yô é hkyô gi, Yhang a tarâ mù nghut lhê lúhú? (Ngò gi, byù hkyam dông taí hting é nghut lhê.) ⁶ Ratsuí lháng a nghut! Haû su ru nghut le gi, haû mingkan lé, Garai Gasang hkâsu wó jéyáng râ lúhú?

⁷ Rayuq yuq, "Ngò mhaû é hkyô gi, Garai Gasang tengmán é hkyô lé lhoq ko jat mù, Yhâng é hpungwup shingkan lé je wó lhoq hu nhang é nghut le nhîng, haí mù luí, ngò, yubak byù rayuq dông mara byí é hui zô nyí ra shirâ lúhú?" ga taí dang-rháng râ nghut lhê. ⁸ "Ge é hkyô htoq sháng gaq, nga-nhúng, agè ashop hkyô kut sháng." nghû haí mù a taí kô é lúhú? Dang haû lé ngamoq taí é nghut lhê ga luí, ngamoq lé lumù gansang é dông byù ra-am taí akô. Haú bang gi, mara dam byí é hui zo gíng bang nghut akô.

Dingmán Byù A Nyí

⁹ Haû jáng, hkâsu nghû lo râ lúhú? Nga-nhúng gi, je gè bang nghut lhê lúhú? Ratsuí lháng a nghut. Yudaq byù

☆ 3:4 Hkya-on 51:4

nghut nghut, tûngbaù pé nghut nghut, yubak mara hkaù
mâ é bang chyat nghut lhê nghû, ngamoq taì san kyô wú
bê nghut lhê. ¹⁰ Chyúmdang má kâ tô é le,

"Dingmán é byù a nyì, rayuq lháng a nyì nghut ri;

¹¹ Sê gyô é byù rayuq le a nyì, Garai Gasang lé ho é byù le
a nyì nghut ri;

¹² Lhunglháng bang gi, lhing ló byuq bekô; yhangmoq gi,
hpau a dap bang chyat dut byuq bekô nghut ri.

Ge é kut sù ó a nyì, rayuq lháng a nyì nghut ri."✠

gâ ri.

¹³ "Yhangmoq é hkyung gi, hpông tô é lup pé nghut akô;
yhangmoq é shô gi, mhaù akô."✠

"Yhangmoq é nhutwuì pé má gi, shîduq bò lhangmuì é
duq dap bum ri."✠

gâ tô ri.

¹⁴ "Yhangmoq é nhut pé gi, nhing myíng nhing htê eq
myit nò danghko baú byíng zan tô ri."✠

gâ tô ri.

¹⁵ "Yhangmoq é hkyî pé gi, byù sat sui lhoq htoq râ matú,
lawán nau akô;

¹⁶ Yhangmoq sô nyi é hkyô pé gi, htên byoq é eq wuìhkê é
ahkô tông tô é nghut mù,

¹⁷ ngingón é hkyô lé gi, yhangmoq a sé kó nghut
ri."✠

gâ tô ri.

¹⁸ "Yhangmoq é myoq hí má Garai Gasang lé gyuq
hkgungâ é hkyô, a bò kó nghut ri."✠

gâ tô ri.

¹⁹ Byù yuq hkgangmó é nhut gi, tû taì jang a joq dut byuq
mù, mingkan gón gi, Garai Gasâng é hí má mara bo é bang

✠ 3:12 Hkya-on 14:1-3 ✠ 3:13 Hkya-on 5:9 ✠ 3:13 Hkya-on 140:3

✠ 3:14 Hkya-on 10:7 ✠ 3:17 Esai 59:7-8 ✠ 3:18 Hkya-on 36:1

dut nyi sháng gaq ga, haû jep é tarâ má taí é lhunglhang gi, jep é tarâ ô má nyi é bang lé taí é nghut é hkyô lé, nganhúng sê lê. ²⁰ Haû mù luí, jep é tarâ lé châng é đông mai, ó yuq le, Yhâng é hí má dingmán sù gâ é wó hui râ a nghut; jep é tarâ đông gi, yubak mara bo é hkyô lé wó sê yu é za nghut lê.

Lumj́ng Jáng, Dingmán Sù Wó Dut É Hkyô

²¹ Ahkuí kúm gi, jep é tarâ đông a nghut é za, haû jep é tarâ eq myiqhtoi laiká pé mai saksé hkâm tô é Garai Gasâng chyáng mâ é dingmán hkyô lé, sé nhâng bê nghut ri. ²² Garai Gasâng chyáng mâ é dingmán hkyô haû gi, Yesuq Hkrisduq lé lumj́ng é đông mai nghut mù, lumj́ng bang banshoq htoq má jé é nghut lê. Gamhkuí é hkyô a joq. ²³ Hkâsu mù gâ le, lhunglhang bang gi, yubak mara kut shut bê bang chyat nghut mù, Garai Gasâng é hpungwup shingkang lé a hkyit hkap byuq lo kó nghut ri. ²⁴ Ahkuí kúm gi, Hkrisduq Yesuq mai lo é hkyi yù hkyô đông, Garai Gasâng é jejú eq, mara hkyut san byí é láí láí wó hui bê nghut ri. ²⁵ Garai Gasang gi, Yesuq é sui lé lumj́ng bâng matú, shíhtaí gunglik hkungga ralhum đông, Yesuq lé byí pyám bê nghut ri. Haû gi, láí lò bê yubak mara lé lhut pyám byi shoq, Garai Gasang myit hîng byi bê nghut é yanmai, Yhâng é tengmán hkyô lé tân shit é nghut ri. ²⁶ Garai Gasang haû su kut é gi, Yhânggùng yhang dingmán Sù nghut é eq, Yesuq lé lumj́ng é sù lé mara hkyut san byí é Sù nghut râ matú, ahkuí lê ipyat má, Yhâng é tengmán hkyô lé shit byí é nghut lê.

²⁷ Haû su nghut jáng, nghutbun jowò joq ri lú? A joq. Hai tarâ mai a joq dut byuq é lú? Haû jep é tarâ châng é yanmai nghut lê lú? A nghut, lumj́ng hkyo é yanmai sheq a joq dut byuq é nghut lê. ²⁸ Hkâsu mù gâ le, byù gi, haû jep é tarâ châng é đông a nghut é za, lumj́ng luí,

mara hkyut san byi huê é hkyô lé, ngamoq lum nyi lhê. ²⁹ Garai Gasang gi, Yudaq byu pê é Garai Gasang za nghut lhê lhú? Tûngbaù pê é Garai Gasang le a nghut lhú? Nghut lhê, tûngbaù pê é Garai Gasang le nghut lhê. ³⁰ Hkâsu mù gâ le, Garai Gasang gi, rayuq za nghut é yanmai, rajung za lumjîng luî, ahpyo-kuq hpyit hkam é bang lé le, ahpyo-kuq a hpyit é bang lé le, Yhang, mara hkyut san byi râ nghut lhê. ³¹ Haù nghut jáng, nga-nhúng gi, lumjîng myit hau èq, jep é tarâ lé lhoq hpoî pyám râ lhú? Ratsuí lhang a nghut! Nga-nhúng gi, jep é tarâ haù lé lhoq ging tîng é bang ru nghut lhê.

4

Abraham, Mara Hkyut San Huê É Hkyô

¹ Haù su nghut jáng, nga-nhúng é îchyí îwa Abraham gi, haù hkyô mai haî wó sê yu ri nghû, taí râ lhú? ² Abraham gi, zui saî é dông mai, mara hkyut san byi huê é ru nghut le gi, yhang nghutbun jang joq râ nghut lhê; nghut kôlhang, Garai Gasâng é hí má gi, yhang haù dông a nghut. ³ Chyúmdang má hkâsu gâ tô ri lhú gâ le, "Abraham gi, Garai Gasang lé lumjîng bê nghut mù, yhang lé, dingmán sù ga són byi bê nghut ri."☆ gâ ri.

⁴ Zui saî é sù gi, yhang é zuihpau lé, chyunghuq dông wó yu é a nghut é za, wó yu gíng luî, wó yu é ru nghut lhê. ⁵ Nghut kôlhang, zui saî é hkyô dông a nghut é za, haù agè ashop hkyô lé mara hkyut san byî é Garai Gasang lé lumhkau é sù gi, yhang é lumjîng myit é yanmai, dingmán sù ga són byi huê é nghut lhê. ⁶ Haù eq rajung za, yhang zui saî é hkyô dông a nghut é za, Garai Gasâng èq dingmán sù ga són byi huê é, Garai Gasâng chyáng mâ é shimân jeju wó é sù eq séng luî, Dawiq taî é gi,

☆ 4:3 Apûn 15:6,22

7 "Tarâ lu lâi é lé mara hkyut pyám byi huí é eq yubak mara lé nghop pyám byi huí é bang gi, hkungsô wó nyi ri.

8 Bo tô é mara lé, Yhumsing èq mara a són byî é hui sù gi, hkungsô wó nyi ri."☆

gâ ri.

9 Haú sù é jeju gi, ahpyo-kuq hpyit hkâm bâng é matú za nghut lhê l hú? Ahpyo-kuq a hpyit bâng é matú le nghut lhê l hú? Hkâsu mù gâ le, Abraham é lumjínng myit lé, dingmán sù ga són byi bê nghut lhê nghû, ngamoq taí nyi bê nghut lhê. 10 Haú su són byî é gi, hkâ-nhám nghut lhê l hú? Ahpyo-kuq hpyit hkâm é htâng má l hú? A nghut jáng, hí má l hú? Haú gi, ahpyo-kuq hpyit hkâm é htâng má a nghut é za, hí má ru nghut lhê. 11 Hau htoq agó, Abraham gi, yhang, ahpyo-kuq hpyit a hkam yù shí é hkûn mai, lumjínng luí wó é dingmán hkyô gâ é dizik nghut é, ahpyo-kuq hpyit masat lé myang hkam yù bê nghut ri. Haú mù, yhang gi, haú ahpyo-kuq hpyit a hkam yù kôlhang, lumjínng é lhunglhâng bang lé dingmán bang ga són byî é wó hui râ matú, haú bâng é îwa dut bê nghut ri. 12 Haú ahpyo-kuq hpyit hkâm é za a nghut, nga-nhûng é îwa Abraham, ahpyo-kuq hpyit a hkam yù shi má wó é lumjínng hkyo é hkyî-kám lé cháng luí ahpyo-kuq hpyit bâng é îwa le, yhang nghut ri.

13 Mingkân é amyû hkûng xoq pé dut râ ga, Abraham eq yhâng é awut ashín pé lé byi tô é danggidiq gi, jep é tara é yanmai a nghut é za, lumjínng hkyô mai lo é dingmán hkyô dông ru nghut lhê. 14 Hkâsu mù gâ le, jep é tarâ dông nyi yap é bang gi, amyû hkûng xoq pé nghut é nghut jáng, lumjínng hkyô gi, akyû a bo é eq, danggidiq gi, hpau a dap é dut byuq lhê. 15 Haú jep é tarâ gi, nhikmo-yo hkyô lhoq

☆ 4:8 Hkya-on 32:1-2

htoq é nghut lhê; nghut kôlhang, jep é tarâ a joq jáng gi, tarâ lu lai hkyô le joq râ a nghut.

¹⁶ Haû mù luî, danggidiq gi, Abraham é awut ashín lhunglhang bâng chyáng, jeju mai za lo é eq gingtîng nyi é dut sháng gaq ga, lumjîng hkyô mai lo é nghut lhê. Haû gi, jep é tarâ má lòm bâng é matú baú za a nghut, Abraham é lumjîng hkyô má lòm bâng é matú le nghut lhê. Abraham gi, nga-nhúng lhunglhang bâng é îwa nghut ri. ¹⁷ "Ngò gi, nang lé, byù myû myo myô é îwa dut nhâng bê."☆ ga kê tô é eq rajung za, haû shi byuq bê bang lé wó lhoq dui é eq a joq wú é zè lé joq shoq wó kut é, yhang lumjîng é sù Garai Gasâng hí má, Abraham gi, nga-nhúng é îwa nghut lhê.

¹⁸ "Náng é awut ashín pé le, haû eq rajung za myô lò râ nghut lhê."☆ ga yhang lé taî kyô to bê eq rajung za, yhang gi, myit myoqbyù jowò haî a joq kôlhang, lumjîng luî myoqbyu nyi é nghut mù, byù myû myo myô é îwa dut bê nghut ri. ¹⁹ Yhang gi, rashô zàn kê jé byuq bê nghut mù, yhanggùng gi, shi é gyá dut é hui zô é eq Sarah é zoyhûm shibó le shum byuq kôlhang, yhang gi, lumjîng myit a yom byuq nghut ri. ²⁰ Hau htoq agó, Garai Gasâng é danggidiq eq séng luî, a lumjîng a dut é eq hê myit mhô myit a dut é za, yhang é lumjîng myit lé saî lhoq ging tîng mù, Garai Gasang lé hkya-on kungtôn luî, ²¹ Garai Gasang gi, Yhang byî tô é danggidiq eq rajung za wó kut râ a-tsam bò sù nghut é lé, yhang myit zing nyi ri. ²² Hau é yanmai, "Yhang lé, dingmán sù ga són byi bê nghut ri."☆ gâ tô é nghut lhê. ²³ "Yhang lé, són byi bê." ga, kê tô é dang gi, yhang é matú za a nghut, ²⁴ nga-nhúng é Yhumsîng Yesuq lé, shi é mai lhoq dui toq yû sù Garai Gasang lé lumjîng luî, Yhang èq dingmán bang ga són byi râ nghut é, nga-nhúng é matú le nghut lhê. ²⁵ Yhumsîng Yesuq gi, nga-nhúng é

☆ 4:17 Apûn 17:5 ☆ 4:18 Apûn 15:5 ☆ 4:22 Apûn 15:6

yubak marâ é matú, shî hkám byi râ dông ap pyâm é hui luí, nga-nhúng, mara hkyut san byî é hui râ matú, lhoq dui toq é hui bê nghut ri.

5

Nguingón Hkyô Eq Gabú Hkyô

¹ Haú mù luí, nga-nhúng gi, lumjíng é dông mai mara hkyut san byî é hui bê nghut é yanmai, nga-nhúng é Yhumsîng Yesuq Hkrisduq dông, Garai Gasang eq buinùm wó xoq yû bê nghut lhê. ² Yesuq é yanmai, nga-nhúng gi, ahkuí wó yu to bê jeju shî má, lumjíng luí wó wâng bê nghut mù, Garai Gasâng é hpungwup shingkang lé myoqbyù luí gabú gumrong nyi lhê. ³ Haú za a nghut, nga-nhúng gi, wuîhke jamjau hkyô pé má le gabú gumrong nyi lhê. Hkâsu mù gâ le, wuîhke jamjau hkyô gi, hkam jan hkyô lhoq htoq ri; ⁴ hkam jan hkyô gi, myit a-tsam lhoq htoq lhê; myit a-tsam gi, myoqbyu to hkyô lhoq htoq é lé, nga-nhúng sê lhê. ⁵ Myoqbyu to hkyô haú gi, nga-nhúng lé myit wum gyui nhang é a nghut; hkâsu mù gâ le, Garai Gasang gi, Yhâng é chyitdap myit lé, Yhang mai, nga-nhúng lé byî tô é Chyoiyúng Woi-nyí dông, nga-nhúng é i-myit unghkaû má hut kat byi bê nghut ri.

⁶ Hkâsu mù gâ le, nga-nhúng gi, a-tsam a bò dut tô ashî u lé, ahkyíng hkyak má yhang, Hkrisduq gi, yubak dap bang nghut é nga-nhúng é matú shî hkám byi bê nghut ri. ⁷ Gè gè ga jáng, dingmán su é matú shî hkám byi râ byù gi, shau râ nghut lhê; nghut kôlhang, byù gè rayuq é matú kúm gi, wám shî hkâm é byù nyi sê lhê. ⁸ Nghut kôlhang, nga-nhúng gi, yubak dap bang nghut nyi ashî hkûn, nga-nhúng é matú Hkrisduq shî hkám byî é má, Garai Gasang gi, Yhâng é chyitdap myit, nga-nhúng lé shit byi bê nghut ri.

⁹ Nga-nhúng gi, ahkuî, Yhâng é sui mai mara hkyut san byî é hui bê nghut mù, Yhâng é yanmai, Garai Gasâng é nhikmo-yo hkyô mai, hkyi yu é je riyhang hui râ nghut lhê. ¹⁰ Hkâsu mù gâ le, nga-nhúng gi, Garai Gasâng é gyè pé nghut nyi ashî u le, Yhâng Zo shî hkám byî é đông, Garai Gasang eq buinùm wó xoq yu é hui bê nghut lhê. Wó xoq yu to bê nghut jáng, nga-nhúng gi, Yhâng é asak đông mai, gè gè yhang hkyi yu é hui râ nghut lhê. ¹¹ Haû su za a nghut, nga-nhúng gi, nga-nhúng é Yhumsîng Yesuq Hkrisduq đông mai, buinùm wó xoq yu é jeju lé, ahkuî wó yu to bê nghut mù, Yhâng é yanmai, Garai Gasang má le, gabú gumrong nyi lhê.

Shi É Gi, Adam É Yanmai, Dui É Asak Gi, Hkrisduq É Yanmai

¹² Byù rayuq đông mai, yubak mara gi, mingkan má jé wâng bê nghut luî, shî-nò hkyô gi, yubak marâ é yanmai châng jé bê nghut ri; haû đông mai, byù lunglhang bang gi, yubak dap bang chyat nghut byuq mù, shî-nò hkyô gi, byù lunglhang bâng chyáng jé bê nghut ri. ¹³ Hkâsu mù gâ le, haû jep é tarâ lé a byi shimá, yubak mara gi, mingkan má joq to bê nghut lhê. Nghut kôlhang, jep é tarâ a joq shî é hkûn gi, yubak mara lé mara su a ngàm shî é nghut lhê. ¹⁴ Haû su ga kôlhang, Adam su hknmó lé lu laî é đông mara a kut shut bâng é ahtoq má lhang, shî-nò hkyô gi, Adâm é ipyat mai Mosheq é ipyat jé shoq up nyi bê nghut ri. Adam gi, jé lé lò râ su é azòng nghut ri.

¹⁵ Nghut kôlhang, jeju chyunghuq gi, haû mara kut shut é hkyô su a nghut; hkâsu mù gâ le, mara kut shut é byù rayuq é yanmai, byù myo myo shi pyâm é nghut le gi, Garai Gasâng jeju eq Yesuq Hkrisduq gâ é byù rayuq é jeju mai lo é chyunghuq gi, byù myo myô é htoq má hkâ-í yhang byíng mui nyi ri-nhung! ¹⁶ Garai Gasâng jeju chyunghuq gi, byù rayuq kut é yubak mara su a nghut;

hkâsu mù gâ le, tarâ jéyáng é hkyô gi, byù rayuq é mara má cháng mù, mara dam byî é hkyô lhoq htoq é nghut lhê; nghut kôlhang, jeju chyunghuq gi, tarâ lu lai bang myo myo má cháng mù, mara hkyut san byi hkyô lhoq htoq é nghut lhê. ¹⁷ Hau htoq agó, byù rayuq tarâ lu lai luî, haû rayuq é yanmai, shî-nò hkyô up nyî bê nghut lhê, ahkuî kúm, haû Garai Gasâng é agùn agó shimân jeju eq dingmán hkyo é chyunghuq lé hap yu é bang gi, Yesuq Hkrisduq gâ é byù rayuq dông mai, je riyhang asak duì hkyô má uphkang nyî kó râ nghut lhê.

¹⁸ Haû mù luî, tarâ lu lai é hkyô ralhûm é yanmai, byù lhunglhang bang gi, mara dam byî é hui zo kô é su, dingmán hkyo é muzó ralhûm é yanmai, byù lhunglhang bang gi, asak duì hkyô eq sêng é mara hkyut san byi hkyô lé wó bê nghut ri. ¹⁹ Hkâsu mù gâ le, byù rayuq jîno a gyô é yanmai, myo myo gi, yubak dap bang dut byuq é su, byù rayuq jîno gyô é yanmai, myo myo gi, dingmán bang gâ é hui kó râ nghut lhê.

²⁰ Haû jep é tarâ jat é gi, tarâ lu lai hkyô je myo râ matú nghut lhê. Nghut kôlhang, yubak mara myô jat é hkûn, jeju gi, je riyhang myô jat lo é nghut lhê. ²¹ Haû mù, yubak mara gi, shî-nò hkyô dông uphkang bê su, jeju gi, nga-nhûng é Yhumsîng Yesuq Hkrisduq é yanmai, ahtum abyuq é asak wó byî é dingmán hkyô dông up râ nghut lhê.

6

Hkrisduq Eq Rading Ralhûm

¹ Haû nghut jáng, nga-nhúng gi, hkâsu nghû tái râ lúhú? Jeju myô jat lò sháng gaq nghû, nga-nhúng, yubak mara kut xoq nyî râ lúhú? ² Haû su a nghut sháng gaq! Nga-nhúng gi, yubak mara eq shi gang bê bang nghut lhê; hkâsu mù haú má wó dui nyi lo râ lúhú? ³ Hkrisduq Yesuq

eq rading ralhūm za dut rā matú, wui-myhup hkâm yù bê bang nga-nhúng banshoq gi, Yhâng é shî hkám hkyô má le rading ralhūm za dut rā matú, wui-myhup hkâm yù bê nghut é lé, nungmoq a sé kó lúhú? ⁴ Haû mù luî, Hkrisduq gi, Îwâ é hpungwup shingkâng èq, shî bê mai lhoq dui toq huî é su, nga-nhúng le, asak asik dông wó dui nyi sháng gaq nghû, nga-nhúng gi, wui-myhup hkâm é dông, Yhang eq rahá, shî hkâm é eq myhup yhum é hui bê nghut lhê.

⁵ Nga-nhúng gi, Yhang shî hkám é hkyô má, Yhang eq rading ralhūm za dut bê nghut jáng, Yhâng é dum dui toq hkyô má le, Yhang eq rading ralhūm za hkyak dut rā nghut lhê. ⁶⁻⁷ Hkâsu mù gâ le, shî bê sū gi, yubak mara mai lhoq lhut é hui bê nghut é yanmai, nga-nhúng gi, yubak marâ é jùn dut nó a ra lo mù luî, yubak mara gùng gi, lhoq htên pyâm é hui rā matú, nga-nhúng é byu xau gi, Yhang eq rahá jén sat pyâm é hui bê nghut é hkyô lé, nga-nhúng sê lhê.

⁸ Haû mù, nga-nhúng gi, Yhang eq rahá shî hkám bê nghut jáng, Yhang eq rahá dui nyi rā nghut lhê nghû, lumjíngh lhê. ⁹ Hkâsu mù gâ le, Hkrisduq gi, shî bê mai lhoq dui toq é hui bê nghut mù, Yhang gi, dum wó shi lo rā a nghut é lé, nga-nhúng sê lhê; shî-nò hkyô gi, Yhang lé hkâ-nhám le wó sing to rā a nghut lo. ¹⁰ Yhang shî hkâm é shî-nò hkyô gi, banshoq bâng é matú, yubak mara eq séng luî radàm za shî hkám byi bê nghut ri; nghut kôlhang, Yhang dui nyi é asak gi, Garai Gasâng hí má dui nyi é nghut lhê.

¹¹ Haû eq rajung za, nungmoq gi, yubak mara eq shi gang luî, Hkrisduq Yesuq dông Garai Gasâng é matú asak dui nyi lhê nghû, sôn yù keq. ¹² Haû mù luî, nungmoq é htên byoq sê é gungdu má, yubak mara lé hkâ-uphkâng nhâng, uphkâng nhâng kô é nghut jáng, gungdu yut yut ô nau é agè ashop hkyô lé, nungmoq châng é nghut bê.

¹³ Nungmoq é gungdu showui showang pé lé, agè ashop hkyo é chùng zè pé dông yubak mara má hkâ-ap byî pyám kó, shî bê mai lhoq dui toq yû huí é bang su, yhumsing gùng yhumsîng, Garai Gasâng chyáng kúm ap byi keq; nungmoq é gungdu showui showang pé lé, dingmán hkyo é chùng zè pé dông, Garai Gasâng chyáng ap byi keq. ¹⁴ Hkâsu mù gâ le, nungmoq gi, jep é tarâ hkaû má a nghut lô é za, jeju hkaû má nghut nyî bekô yanmai, yubak mara gi, nungmoq lé sîng sù wó dut râ a nghut lo.

Dingmán Hkyo É Jùn Pé

¹⁵ Haû jáng gi, hkâsu kó lhú? Nga-nhúng gi, jep é tarâ hkaû má a nghut lo é za, jeju hkaû má nghut nyî bekô yanmai, mara wó kut shut kó râ lhú? Haû su a wó kut!

¹⁶ Nungmoq gi, rayuq yuq é jîno gyo râ matú, yhumsing gùng lé jùn pé dông ap pyâm é hkûn, shî-nò hui râ nghut é yubak marâ é jùn dông nghut kôlhang, dingmán hkyô wó râ nghut é jîno gyo hkyô nghut kôlhang, nungmoq châng nyi é nghut le gi, nungmoq, haû é jùn dut bê lé, a sé kó lhú? ¹⁷ Nungmoq gi, yubak marâ é jùn dut wú bê bang nghut kôlhang, nungmoq hkam yu to bê mhoqshit hkyô lé, nungmoq é myit nhiklhum banshoq èq cháng bekô nghut é yanmai, Garai Gasang lé jeju hkyo-on sháng.

¹⁸ Nungmoq gi, yubak mara mai lhoq lhut é hui bang nghut kômù, dingmán hkyo é jùn dut bekô nghut ri.

¹⁹ Nungmoq gi, sê gyô é nyan má wum nyhôm é bang nghut kô é yanmai, byu pé sê gyo râ dông ngò tái râ ga jáng: nungmoq gi, nungmoq é gungdu showui showang pé lé, a sansêng é hkyô eq agè ashop hkyô myô jat nhang é má jùn dông lhang ap byî wú bekô nghut é su, ahkuî gi, chyoyúng hkyô wó yû râ matú, haû pé lé, dingmán hkyô má jùn dông ap byi keq. ²⁰ Nungmoq gi, yubak marâ é jùn dut nyî kô é hkûn, dingmán hkyo èq uphkang é mai lut

nyì kô é nghut lhê. ²¹ Ahkuî, nungmoq hoqjung nghû wú htoq é pé gi, haú u lé, hai akyû wó yû kô é lhú? Hau pé gi, shi byuq é má htûm é chyat nghut ri. ²² Nghut kôlhang, ahkuî gi, nungmoq, yubak mara mai lhoq lhut é hui bekô nghut mù, Garai Gasâng é jùn dut bekô nghut ri; hau é akyû gi, chyoiyúng hkyô wó yu é nghut mù, ahtum abyuq é asak wó râ nghut lhê. ²³ Hkâsu mù gâ le, yubak marâ é ahpau gi, shi é hkyô nghut ri; nghut kôlhang, Garai Gasâng é chyunghuq gi, nga-nhúng é Yhumsîng Hkrisduq Yesuq é yanmai, ahtum abyuq é asak nghut ri.

7

Tarâ Mai Lut É Hkyô

¹ Gumang wuì ê, ngò gi, tarâ lé sê é bang nungmoq lé taì nyi lhê: haú tarâ gi, byù rayuq lé, yhang, asak dui nyi é u lé za wó uphkanq é lé, nungmoq a sé kó lhú? ² Dangké, ikun wàng bê myiwe myhí rayuq gi, yhâng é yhumsîng hpó asak dui nyi é ahkyíng má, tarâ êq up zing tô é hui ri; nghut kôlhang, yhâng é yhumsîng hpó shi byuq é nghut jáng gi, haú ikun wàng tarâ mai, yhang wó lut bê nghut ri. ³ Haú nghut é yanmai, yhâng é yhumsîng hpó asak dui nyi ashî u lé, yuqgè góyuq eq hâng lhûm é nghut jáng gi, yhang lé, sulàng lú sù ga kó râ nghut lhê. Nghut kôlhang, yhâng é yhumsîng hpó shi byuq é nghut jáng gi, yhang, tarâ haú mai lut bê nghut luí, yuqgè góyuq eq hâng lhûm kôlhang, sulàng lú sù a nghut lo.

⁴ Haú mù luí, ngá é gumang wuì ê, nungmoq le, haú shi byuq é mai lhoq dui toq yù hui bê sù Yuqgè chyáng wó xoq mù, nga-nhúng gi, Garai Gasang lé ashi wó zui byi sháng gaq ga, Hkrisduq é gungdu dông mai, jep é tarâ eq shi gang bê nghut lhê. ⁵ Hkâsu mù gâ le, nga-nhúng, yubak gungsho má nghut nyi é hkûn, nga-nhúng gi, shî-nò hkyo é ashi zui sháng gaq ga, jep é tarâ é yanmai htoq lo é yubak

yut yut ô nau é hkyô gi, nga-nhông é gungdu pé má mũ zui nyi é nghut lhê. ⁶ Nghut kôlhang, ahkuí gi, nga-nhông lé up zing tô é jep é tarâ eq shi gang bê nghut mũ, jep é tarâ mai lut bê nghut é yanmai, kê tô é hkyô xau đông a nghut é za, Woi-nyí é hkyô sik đông nga-nhông dojaú nyi é nghut lhê.

Jep É Tarâ Eq Yubak Mara

⁷ Haú jáng, nga-nhông hkâsu taí rã lú? Jep é tarâ gi, yubak mara nghut lhê lú? Ratsuí lhang a nghut! Gè gè ga jáng, haú jep é tarâ đông mai za a nghut le, yubak mara lé, ngò wó sê é a nghut. Hkâsu mù gâ le, "myoqnoq myit hkâbô"[☆] ga jep é tarâ má a taí tô é nghut jáng, myoqnoq é hkyô lé, ngò sé rã a nghut. ⁸ Nghut kôlhang, yubak mara gi, hkunmó é ahkáng lé chông mù, ngò má myoqnoq hkyô jung hkangmó lhoq htoq byí ri; hkâsu mù gâ le, jep é tarâ hkaú má a nghut jáng, yubak mara gi, shi é za nghut lhê. ⁹ Ngò gi, tarâ hkaú má a nghut é za asak dui wú bê nghut lhê; nghut kôlhang, haú hkunmó htoq lô jáng, yubak mara gi, dui lò mù, ngò gi, shi bê nghut lhê. ¹⁰ Haú mù luí, asak dui nhâng rã matú nghut é hkunmó haú gi, shi-nò hkyô dut byuq é lé, ngò wó sê é nghut lhê. ¹¹ Hkâsu mù gâ le, yubak mara gi, hkunmó é ahkáng lé chông mù, ngò lé mhaú yù luí, hau èq ngo lé shi nhang ri. ¹² Hau pé lé wú jáng, jep é tarâ gi, chyoiyúng ri; haú hkunmó gi, chyoiyúng, dingmán é eq ge é nghut ri.

¹³ Haú nghut jáng, ge é hkyô haú gi, ngá é matú shi-nò hkyô dut byuq bê lú? Haú đông a nghut! Nghut kôlhang, yubak mara lé gi, yubak mara đông hkyak wó lhoq htoq shit rã matú, haú ge é hkyô đông mai, yubak mara gi, ngò má shi-nò hkyô lhoq htoq bê nghut luí, yubak mara gi, gè

[☆] 7:7 Htoq Ló 20:17

gè yhang agè ashop dut é lé, hkunmó đông mai tân shit é nghut lhê.

¹⁴ Hau htoq agó, jep é tarâ gi, woi-nyí eq sêng é hkyô nghut é lé, nga-nhúng sê lhê; nghut kôlhang, ngò má gi, gungsho eq sêng é hkyô za bo é nghut luí, yubak mara má jùn đông ung zô é hui bê nghut lhê. ¹⁵ Ngò haí kut nyi é hkyô lé, ngò a sé. Hkâsu mù gâ le, ngò kut nau é hkyô lé gi, a kut é za, ngò a jú é hkyô lé kut é yanmai nghut lhê. ¹⁶ Ngò a kut nau é lé kut é nghut jáng gi, haú jep é tarâ ge é lé, ngò myit huí é nghut lhê. ¹⁷ Ahkuí gi, haú lé ngò yhang kut nyi é a nghut lo, ngò má lúng tô é haú yubak sheq kut é ru nghut lhê. ¹⁸ Ngò má, nghut bê, ngá é yubak gungsho má ge é hkyô haí le a bo é lé, ngò sê lhê. Hkâsu mù gâ le, ge é hkyô lé kut nau é myit ngò má bò kôlhang, haú lé a wó kut htoq nghut ri. ¹⁹ Hau é yanmai, ngò kut nau é ge é hkyô lé gi, a kut é za, ngò a kut nau é agè ashop hkyô lé gi, ngò xoq kut nyi ri. ²⁰ Ahkuí, a kut nau é hkyô lé ngò kut nyi é nghut jáng, haú lé ngò yhang kut nyi é a nghut lo é za, ngò má lúng tô é haú yubak sheq haú lé kut nyi é ru nghut lhê.

²¹ Haú mù, ge é hkyô lé ngò kut nau é hkûn, ngò má agè ashop hkyô htoq lô lô mù é tarâ lé, ngò myang ri. ²² Hkâsu mù gâ le, ngò gi, Garai Gasâng é tarâ lé, ngá é i-myt unghkaú má myit nguì gabú nyi lhê. ²³ Nghut kôlhang, ngá é gungdu showui showang pé má bo é gotû tarâ gi, ngá é i-myt tarâ eq majan zân lhùm é nghut luí, ngá é gungdu showui showang hkaú má mù zui nyi é yubak é tarâ má, ngo lé shúmbyû dut nhang é lé, ngò myang ri. ²⁴ Ngò gi, shogyo rayhup dut sê nghut ri-nhung! Shí nhang é gungdu shí mai, ó yuq wá, ngo lé wó hkyi yù rá lhú? ²⁵ Nga-nhúng é Yhumsîng Yesuq Hkrisduq đông mai wó lut bê nghut mù, Garai Gasang lé jeju hkya-ôn nyi lhê!

Haú mù luí, ngò yhang, myit é đông gi, Garai Gasâng é

tarâ lé châng lhê, nghut kôlhang, yubak gungsho đông gi, yubak é tarâ lé châng lhê.

8

Haû Woi-nyí Mai Asak Dui É Hkyô

¹ Haû mù luí, ahkuí, Hkrisduq Yesuq má nghut nyí bâng é matú gi, mara byí é hkyô a joq lô é nghut lhê. ² Hkâsu mù gâ le, asak dui hkyô eq sêng é Woi-nyí é tarâ gi, Hkrisduq Yesuq đông, yubak mara eq shî-nò hkyô é tarâ mai, ngo lé lhoq lhut yû bê nghut lhê. ³ Haû jep é tarâ gi, yubak gungshô é yanmai, wum nyhóm luí a wó kut é hkyô lé, Garai Gasang gi, yubak mara hkungga dut nhâng râ matú, yubak byu é gunghkyâng đông, Yhang Zo sîng lé nhang kat é đông kut pyám bê nghut ri. ⁴ Haû mù, Garai Gasang gi, yubak gungsho đông asak a dui é za Woi-nyí đông asak dui bang nghut é nga-nhúng má, haû jep é tarâ má bo é hkyô pé lé, wó lhoq dik râ matú, gungsho ralhum má, mara lé doqđân pyám bê nghut ri.

⁵ Haû yubak gungsho đông asak dui é bang gi, gungsho yut yut ô nau é hkyô pé lé myit zuq nyi akô; haû Woi-nyí đông asak dui é bang kúm gi, Woi-nyí ô nau é hkyô pé lé myit zuq nyi akô nghut ri. ⁶ Haû yubak byu é myit gi, shi é hkyô nghut ri; haû Woi-nyí eq hkgang to huí su é myit kúm gi, asak eq nguingón hkyô nghut ri. ⁷ Haû yubak myit gi, Garaí é tarâ ô má a nyi é htoq agó, haú lé a wó cháng kut é yanmai, Garaí é gyè nghut ri. ⁸ Haû yubak gungshô eq hkgang tô é hui bang gi, Garai Gasang lé a wó gabú nhâng kó nghut ri.

⁹ Nghut kôle, Garai Gasâng é Woi-nyí gi, nungmoq chyáng lúng nyí bê nghut jáng, nungmoq gi, haû yubak gungshô eq hkgang to huí é bang a nghut lô é za, Woi-nyí eq hkgang to huí é bang nghut akô. Rayuq yuq gi, Hkrisduq é Woi-nyí lé a wó é nghut jáng, Hkrisduq eq a

sêng é sũ nghut lhê. ¹⁰ Nghut kôlhang, nàng má Hkrisduq nyi nyi é nghut jáng, náng é gungdu gi, yubak marâ é yanmai shî kôlhang, náng é woi-nyí gi, dingmán hkyo é yanmai dui nyi ri. ¹¹ Hau htoq agó, Yesuq lé shi é mai lhoq dui toq yũ Su é Woi-nyí gi, nungmoq má nyi nyi é nghut jáng, Hkrisduq Yesuq lé shi é mai lhoq dui toq yũ Sũ gi, nungmoq má nyi nyi é, Yhâng é Woi-nyí dông mai, nungmoq é, shî sê é gungdu pé lé le, asak ùi nhâng rã nghut lhê.

¹² Haũ mù luĩ, Gumang wuĩ ê, nga-nhúng gi, yubak gungsho dông asak ùi rã matú, wò wó é bang a nghut. ¹³ Hkâsu mù gã le, haũ yubak gungsho dông asak ùi kô é nghut jáng, nungmoq gi, shî rã nghut lhê; nghut kôlhang, haũ gungshô é shut shaĩ hkyô lé, Woi-nyí eq sat pyám kô é nghut jáng, nungmoq gi, asak ùi rã nghut lhê. ¹⁴ Garai Gasâng é Woi-nyí eq shuĩ u é hui bang gi, Garai Gasâng é yhangzô pé nghut lhê. ¹⁵ Hkâsu mù gã le, nungmoq gi, gyuq rã matú, nungmoq lé jùn dum taũ dut nhang é woi-nyí lé, a hap yu é za, nga-nhúng lé zo yín yu é Woi-nyí lé hap yu tô é bang ru nghut lhê; haũ mù, nga-nhúng gi, Yhang é yanmai, "Aba,* Âwa ê" nghũ wut é nghut lhê. ¹⁶ Nga-nhúng gi, Garai Gasâng é yhangzô pé nghut é lé, Woi-nyí haũ gi, nga-nhúng é woi-nyí eq rahá saksé hkâm nyi ri. ¹⁷ Ahkuĩ, nga-nhúng gi, zo wuĩ nghut bê yanmai, Hkrisduq eq rahá, Garai Gasâng é amyũ hkũngxoq pé wó dut é nghut lhê. Nga-nhúng gi, Hkrisduq é wuĩhke jamjau pé lé, gè gè yhang bo hui zô é nghut jáng, Yhâng é hpungwup shing kang lé le, bo myang hkam yũ rã nghut lhê.

Htângnùng Lhê É Hpungwup Shing kang

* 8:15 Aba gã é gi, Aramaik dang dông "âwa" gã é lichyũm nghut lhê.

¹⁸ Nga-nhông é ahkuê lhê é wuîhke jamjau hkyô pé gi, nga-nhúng lé shit râ nghut é hpungwup shing kang eq whuí râ a gingdán nghú, ngò wó myit ri. ¹⁹ Haû hpan to huí é lhunglhang gi, Garai Gasâng é yhangzô pé lé lhoq htoq shit byi râ lé, gyai yhang myit lánng nyi akô nghut ri. ²⁰ Hkâsu mù gâ le, haû hpan to huí é lhunglhang gi, akyû a bo é chyat dut byuq bê nghut ri. Haû gi, yhumsîng hkyin yu é đông a nghut é za, haû su dut nhâng Sû ô nau é đông kut é nghut ri. ²¹ Haû hpan to huí é lhunglhang gi, htên byoq byuq râ matú shúm dut é mai lhoq lhut é hui luî, Garai Gasâng é yhangzo pê é hpungwup bo é luthkyô má wó wâng râ matú, myoqbyu tô é nghut lhê.

²² Haû hpan to huí é lhunglhang gi, ahkuê hkyíng jé shoq, zohkû-nò no é su nò-kying kyíng nyi kô é lé, nga-nhúng sê lhê. ²³ Haû pé za a nghut, Woi-nyí é sâng-hi ashí† lé wó yû bê bang nga-nhúng le, zo pé đông yín yu é jeju lé lánng uchyang, i-myt unghkaû má nò-kying kyíng é nghut lhê. Zo pé đông yín yu é jeju haû gi, nga-nhông é gungdu hkyi xe yù hkyô nghut lhê. ²⁴ Hkâsu mù gâ le, nga-nhúng gi, myit myoqbyù hkyô haû mai hkyi yu é hui bê nghut lhê. Nghut kôlhang, byu-myang é lé myit myoqbyu é gi, myit myoqbyu é hkyô ratsuí le a nghut. Yhumsîng myang to bê é lé, ó yuq wá myit myoqbyù shirâ lhu? ²⁵ Nghut kôlhang, nga-nhúng gi, a wó shí é lé myit myoqbyu é nghut jánng, myit hîng hîng kut lánng é nghut lhê.

²⁶ Haû eq rajung za, Woi-nyí gi, nga-nhúng wum nyhôm é hkyô má garúm byí ri. Nga-nhúng gi, haû dung râ é lé a sé kôlhang, haû Woi-nyí yhang gi, dang mai a wó taî htoq é nò-kying htê đông, nga-nhông é matú bo dúng xoq byí ri. ²⁷ Nga-nhông é i-myt unghkaû lé gôn wú é Sû gi, haû

† 8:23 Woi-nyí é sâng-hi ashí gâ é gi, Woi-nyí gi, Garai Gasang byí é chyunghuq pé mâ é sâng-hi lhum nghut lhê.

Woi-nyí myit é hkyô lé sê lhê, hkâsu mù gâ le, haû Woi-nyí gi, Garai Gasang ô nau é dông, sân-yúng bâng é matú bo dúng xoq byî ri.

Banshoq Lé Je Wó Ung Pyám Râ Hkyô

²⁸ Garai Gasang gi, Yhang myit sôn tô é eq rajung za, ji yù luî, Yhang lé chyitdap bâng é matú, lhunglháng lé ge é dông chyat kut é hkyô lé, nga-nhúng sê lhê. ²⁹ Hkâsu mù gâ le, Yhang Zo gi, gumang wuî myo myo má zomún dut sháng gaq ga, Garai Gasang gi, hí te sê tô é bang lé, Yhang Zô é sâmlai eq wó púng nhâng râ matú, hí mai masat to bê nghut ri. ³⁰ Hau htoq agó, Yhang, hí mai masat to bê bang lé gi, ji yu ri; ji yù bê bang lé gi, mara hkyut san byî ri; mara hkyut san byî é hui bang lé gi, hpungwup shing kang bò nhang ri.

³¹ Haû jáng gi, shí hkyô eq séng luî, nga-nhúng hái taí shirâ lú? Garai Gasang gi, nga-nhúng hkyam shut nghut jáng, nga-nhúng lé, ó yuq wá gyè wám kut râ lú?

³² Yhumsing é Yhangzo lé lháng a ha bûn é za, nga-nhúng banshoq bâng é matú ap byî pyâm é Sû gi, Yhang lé le, lhunglháng lé le, rahá láí láí byi râ a nghut lú? ³³ Garai Gasang eq hkyin yu to bê bang lé, ó yuq wá mara wó hûn râ lú? Garai Gasang gi, mara hkyut san byi Sû nghut ri.

³⁴ Hkrisduq Yesuq gi, shí hkám luî, shí hkâm é htoq agó, shi é mai lhoq dui toq yu é hui mù, Garai Gasang é loqyo hkyam má nghut nyî luî, nga-nhúng é matú bo dúng xoq byî nyi bê nghut é yanmai, ó yuq wá mara wó byi râ lú?

³⁵ Hkrisduq é chyitdap myit mai, nga-nhúng lé, hai eq wá wó lhoq kang râ lú? Gunjang huî é hkyo èq luq? Wuîhke huî é hkyo èq luq? Zing-ri huî é hkyo èq luq? Mutmó huî é hkyo èq luq? Gùng chin dut huî é hkyo èq luq? Gyuq jung èq luq? Sham èq luq? ³⁶ Haû gi,

"Náng é yanmai, ngamoq, nyí wuî sat pyâm é huî nyi ri;

sat rã matú nyhi tô é sau pé lé su, ngamoq lé myit pyâm akô."[☆]

ga kã tô é eq rajung za nghut ri. ³⁷ A wó lhoq kang; nga-nhúng lé chyttdap Su é yanmai, nga-nhúng gi, haú pé banshoq lé je wó ung pyâm é nghut lhê. ³⁸ Hkãsu mù gã le, shî kôlhang, byùn kôlhang, maumang lagyô pé nghut kôlhang, agè ashop é nat pé nghut kôlhang, shí ipyat nghut kôlhang, htang pyat nghut kôlhang, haí jung a-tsam pé nghut kôlhang, ³⁹ htoq tsáng mã é nghut kôlhang, a-ô tsáng mã é nghut kôlhang, hpan tô é gotû haí nghut kôlhang, nga-nhúng é Yhumsîng Hkrisduq Yesuq mã bo é Garai Gasâng é chyttdap myit mai, nga-nhúng lé wó lhoq kang pyám rã a nghut nghû, ngò gi, hkyak wó sê yu ri.

9

Garai Gasang Hkyin Yu É Israelaq Byu Pé

¹ Ahkuî, ngò gi, Hkrisduq mã tengmán é dang taí rã; ngò a mhaû é lé, haû Chyoiyúng Woi-nyí gi, ngá é unghkaû myit mã hkyak saksé hkâm nyi ri. ² Ngò gi, ngá é myit nhiklhum mã, gyai yhang yón kuq nyi é eq ayang hpuzô nyi lhê. ³ Hkãsu mù gã le, ngò gi, ngá é byuhú, ngá é gumang wui é matú, nhîng é hui luí Hkrisduq eq gang le lháng gè rã su gã ri. ⁴ Haú bang gi, Israelaq byu pé nghut lhê. Zo yín yû huí é hkyô le, hpungwup shinggang le, dangshikaq pé le, tarã lé myang hap yu é hkyô le, noqkuq yhûm mã noqkuq é hkyô le, danggidiq pé lé le, yhangmoq wó yu akô nghut ri. ⁵ Haû myîng hû é îchyí îwã pé gi, yhangmoq é îchyí îwã pé nghut luí, byu é hkyam dông gon jáng, Hkrisduq gi, yhangmoq amyû mã é nghut ri. Yhang gi, lhunglháng lé up é, ahtum abyuq hkya-on huí é Garai Gasang nghut ri! Amen.

[☆] 8:36 Hkya-on 44:22

⁶ Haû gi, Garai Gasâng é danggidiq akôm dut byuq bê nghû nau é a nghut. Hkâsu mù gâ le, Israelaq byu pé banshoq bang gi, Israelaq byù akying chyat a nghut kó nghut ri. ⁷ Abraham é awut ashín banshoq bang gi, yhâng é zo wuî akying chyat nghû a wó taî é nghut lhê. Hau é malaî, "Isak dông mai lo é lé, náng é awut ashín nghû són byi râ nghut lhê."✠ gâ tô ri. ⁸ Radông taí sháng ga jáng, gungsho mai hku é zo wuî gi, Garai Gasâng é zo wuî akying a nghut kó, danggidiq eq sêng é zo wuî za sheq, Abraham é awut ashín pé dông són byî é nghut lhê. ⁹ Hkâsu mù gâ le, "Masat tô é ahkyíng má, ngò dum taû lé mù, Sarah gi, yuqzo hkû râ nghut lhê."✠ ga taî tô é danggidiq é yanmai nghut lhê.

¹⁰ Haû za a nghut, Rebeka é yhangzô nhiktang é îwa gi, nga-nhúng é îwa nghut su Isak rayuq za nghut lhê. ¹¹⁻¹² Nghut kôlhang, Garai Gasang myit hpyit to mù hkyin yu é hkyô gi, muzó mai a nghut é za, hkyin ji yù Su é yanmai nghut é lé, wó gîng nyî sháng gaq ga, haû zozûm nhik a hku lé shî é htoq agó, ge é eq a ge é muzó haî lhang a kut shimá, "Haû ko sù yuq gi, tiq sù yuq lé dojaú râ nghut lhê."✠ ga, Rebeka lé taî kyô tô é nghut lhê. ¹³ Haû gi, "Yakup lé, ngò chyitdap lhê, nghut kôlhang, Eso lé gi, a ngui é nghut lhê."✠ ga kê tô é eq rajung za nghut ri.

¹⁴ Haû nghut é yanmai, nga-nhúng hkâsu nghû taí râ? Garai Gasang gi, a tarâ é sù nghut lhê lhu? Ratsuí lhang a nghut! ¹⁵ Hkâsu mù gâ le,

"Ngò, shogyo nhikmyin naù sù lé, shogyo nhikmyin râ nghut lhê;

Ngò, jeju byi naù sù lé, jeju byi râ nghut lhê."✠

✠ 9:7 Apûn 21:12 ✠ 9:9 Apûn 18:10,14 ✠ 9:11-12 Apûn 25:32

✠ 9:13 Mal 1:2-3 ✠ 9:15 Htoq Lô 33:19

ga, Mosheq lé Yhang taî ri. ¹⁶ Haû mù luí, haû hkyin yu é hkyô gi, byù yut yut ô nau é yanmai le a nghut, shikut é yanmai le a nghut, Garai Gasâng é shogyo nhikmyîn é yanmai za nghut lhê. ¹⁷ Hkâsu mù gâ le, Chyúmdang má, "Náng chyáng Ngá é a-tsam wó tân shit râ eq mingkan gón má Ngá é myìng lhoq pyo é hui râ matú sheq, Ngò, nang lé lhoq toq kat é nghut lhê." [☆] ga, Hpara-uy lé taî ri. ¹⁸ Haû mù luí, Garai Gasang gi, shogyo nhikmyin naù sù lé, shogyo nhikmyin mù, myit lhoq htân byi naù sù lé, myit lhoq htân byî ri.

¹⁹ Nungmoq mâ é rayuq yuq, "Haû jáng, Garai Gasang gi, ngamoq lé haî mù mara hun nyi ashî lhú? Yhang ô nau é hkyô lé, ó yuq wá wó hkûm pyâm lhê lhú?" ga, ngo lé taí kó râ nghut lhê. ²⁰ Nghut kôlhang, Garai Gasang lé dang tu sù byù nàng gi, ó yuq wá nghut lhê lhú? Saî to hui bê é zè pé gi, "Nàng, haî mù ngo lé shî su kut saî tô lhê lhú?" nghû saî é Sù lé wó taí râ lhú? ²¹ Tso-au saî sù gi, tsohtung ralhum mai za, hkik é tso-au pé eq a hkik é tso-au pé saî râ ahkáng wó lhê a nghut kô lhú?

²² Garai Gasang gi, Yhâng é nhikmo-yo hkyô tân shit luí, Yhang é a-tsam lé sé nhâng naù kôlhang, htên byoq râ matú hen tô é, nhikmo-yo gíng é tso-au pé lé, myit hîng hîng shirang pyâm nyi é hkyô lé, taí râ jang haî joq ashî lhú? ²³ Hpungwup shingkâng é matú noq mai hen to bang nghut é, Yhang shogyo nhikmyin huî é bang lé, Yhâng é agùn agó é hpungwup shingkang lé sé nhâng naù mù, Yhang haû su kut é nghut jáng, taí râ haî joq ashî lhú? ²⁴ Haû bang gi, Yudaq byu pé mai za a nghut, tûngbaù pé mai le ji yù huî é bang nga-nhúng nghut lhê. ²⁵ Haû eq rajung za, Hosea laiká má Yhang taî tô é gi, "Ngá é byù myû a nghut é bang lé, 'Ngá é byù myû' nghû;

☆ 9:17 Htoq Ló 9:16

Ngò a chyit é byizo lé 'Ngò chyit sù' nghû wut râ
nghut lhê."✠

gâ ri. ²⁶ Haû mù,

"Nungmoq gi, ngá é byù myû pé a nghut.' nghû yhang-
moq lé taí é jowò má yhang,
yhangmoq gi, 'Rû dui nyi é Garai Gasâng yhangzô pé' ga
wut é hui kó râ nghut lhê."✠

gâ ri.

²⁷ Esai-aq le, Israelaq byu pé eq séng luí garu taí é gi,
"Israelaq yhangzo yhangshû pé gi, wuìshuq lung-aû yàm
má é semuî su myo kôlhang,
myit gyó tô é bang za sheq hkyi yu é hui kó râ nghut
lhê.

²⁸ Hkâsu mù gâ le, haû Yhumsîng gi, myidàm htoq má
Yhâng é tarâ jéyáng hkyô lé hân hân lhoq dik lhoq
htûm pyám râ nghut lhê."✠

gâ ri.

²⁹ Haû eq rajung za, hí lé Esai-aq taí tô é gi,
"A-tsam dik shoq bò sù haû Yhumsîng za, nga-nhúng lé,
awut ashín a myhit to byî é nghut jáng,
nga-nhúng gi, Sodom wà su dut byuq luí, Gomoraq
myuq eq pung byuq râ nghut lhê."✠

gâ ri.

Israelaq Byu Pé A Lumjîng Kô É Hkyô

³⁰ Haû mù, nga-nhúng hkâsu nghû taí râ lhú? Dingmán
hkyô lé a châng hkat é tûngbàu pé gi, haú lé wó yù bekô;
haû gi, lumjîng hkyo é yanmai wó yu é dingmán hkyô
nghut ri. ³¹ Nghut kôlhang, tarâ eq séng é dingmán hkyô
lé châng hkat é Israelaq byu pé gi, haú lé a wó yù kó nghut
ri. ³² Haî mù a wó yù kô é lhú? Yhangmoq gi, lumjîng myit

✠ 9:25 Hos 2:23 ✠ 9:26 Hos 1:10 ✠ 9:28 Esai 10:22-23 ✠ 9:29 Esai
1:9

èq châng hkat kô é a nghut é za, muzó pê èq châng hkat kô é yanmai, a wó yû kô é nghut ri. Yhangmoq gi, "htung htê râ luqgok" má htûng leng bekô nghut ri. ³³ Haû, "Wú keq, htûng leng râ luqgok eq myit leqbat nhâng râ luqmó cham lé, Ngò, Zi-un bùm má lheq to luí, Yhang lé lumhkaû sù gi, hkâ-nhám le hoq hpu é hui râ a nghut."✠ ga kê tô é eq rajung za nghut ri.

10

¹ Gumang wuì ê, ngò gi, haû Israelaq byu pé hkyi yu é hui kó sháng gaq nghû, gyai yhang myit shirông luí, Garai Gasâng chyáng yhangmoq é matú kyûdung byí nyi lhê. ² Hkâsu mù gâ le, yhangmoq gi, Garai Gasâng é hkyô lé gyai yhang myit zuq é bang nghut é lé, ngò saksé hkâm lhê; nghut kôlhang, yhangmoq myit zuq é hkyô gi, hpaqchyí bo é dông a nghut kó. ³ Yhangmoq gi, Garai Gasâng chyáng mai jé lé é dingmán hkyô lé a sé kômù, yhumsíng dingmán bûn é hkyô lé za ho shikut nyi kô é yanmai, Garai Gasâng é dingmán hkyô hkaû má a nyi kó nghut ri. ⁴ Hkrisduq gi, lumjíng bang yuq hkangmó, dingmán é má wó jé kó sháng gaq ga, jep é tarâ ló htûm jang dut bê nghut ri.

⁵ Mosheq gi, "Haú pé dông châng é sù gi, haú pé mai asak duì râ nghut lhê."✠ ga, jep é tarâ eq sêng é dingmán hkyô lé kê sân kyô tô é nghut lhê. ⁶ Nghut kôlhang, lumjíng hkyô eq sêng é dingmán hkyô gi, "Náng é myit nhiklhum má, 'Mauhkûng má, ó yuq doq ló râ lú?'✠ (Haû gi, Hkrisduq lé shuí gyó lò râ gá nau é nghut lhê), ⁷ haû a nghut jáng, 'Nik é jang má, ó yuq gyó wâng râ lú?'✠ (Haû gi, Hkrisduq lé, shi é mai dui toq nhâng râ gá nau é nghut

✠ 9:33 Esai 8:14; 28:16

✠ 10:5 Nhong 18:5

✠ 10:6 Tarâ Pun 30:12

✠ 10:7 Tarâ Pun 30:13

lhê.), nghũ hkâtaí kó." gâ tô ri. ⁸ Haũ jáng, hkâsu gâ tô ri lhú? "Haũ mungdang gi, nàng eq chyâng nyi ri; náng é nhut má le, náng é myit nhiklum má lé nghut nyi ri."✠ gâ tô ri. Haũ gi, ngamoq hko taí é lumjínq hkyô eq sêng é mungdang nghut lhê. ⁹ Haũ mù, "Yesuq gi, Yhumsínq nghut ri." nghũ náng é nhut eq yín yũ mù, Garai Gasang gi, Yhang lé, shi é mai dui toq nhâng bê nghut lhê nghũ, náng é myit nhiklum má lumjínq é nghut jáng, nàng gi, hkyi yu é hui râ nghut lhê. ¹⁰ Hkâsu mù gâ le, byũ gi, myit nhiklum má lumjínq jáng, mara hkyut san byĩ é hui mù, nhut mai yín yũ jáng, hkyi yũ huĩ é nghut lhê. ¹¹ Haũ Chyúmdang taí é gi, "Yhang lé lumhkau é sũ ó yuq le, hkâ-nhám lháng hoq hpũ é hui râ a nghut."✠ gâ ri. ¹² Hkâsu mù gâ le, Yudaq byũ eq tũngbaũ pê é gyoro má gam hkoq é hkyô haĩ le a joq é za, haũ Yhumsínq gi, banshoq bâng é Yhumsínq nghut lhê mù, Yhang lé wut dung bang lhunglháng lé, agùn agó shimân byĩ ri. ¹³ Hkâsu mù gâ le, "Haũ Yhumsínq é myínq lé lãng é bang yuq hkgámó gi, hkyi yu é hui râ nghut lhê."✠ gâ tô ri.

¹⁴ Haũ nghut lé gi, yhangmoq a lumjínq é sũ lé nhĩng, hkâsu wó wut dung kó râ lhú? Yhangmoq a wó gyô wú é sũ lé nhĩng, hkâsu wó lumjínq kó râ lhú? Hko kyô é sũ a nyi le nhĩng, hkâsu wó gyo kó râ lhú? ¹⁵ Nhang kat é a hui le gi, yhangmoq hkâsu kut wó hko kyo kó râ lhú? Haũ eq rajung za, "Gabú danglũ pé hko kyo bâng é hkyĩ-kám pé gi, hkâ-ĩ yhang yúnq ri myhi-nhung!"✠ ga kâ tô ri.

¹⁶ Nghut kôlhang, Israelaq byu pé banshoq bang gi, gabú danglũ lé hap yũ kô é a nghut. Hkâsu mù gâ le, Esai-aq gi, "Yhumsínq ê, ngamoq é danglũ lé ó yuq wá lumjínq é lhú?"✠ ga taĩ ri. ¹⁷ Haũ nghut mù luĩ, lumjínq myit gi,

✠ 10:8 Tarâ Pun 30:14 ✠ 10:11 Esai 28:16 ✠ 10:13 Yol 2:32 ✠ 10:15

Esai 52:7 ✠ 10:16 Esai 53:1

danglù lé wó gyô é mai lò mù, danglù gyô yu é gi, Hkrisduq é mungdang mai lo é nghut lhê. ¹⁸ Nghut kôhlang, ngò myi kó lé: yhangmoq gi, a wó gyô wú kô é nghut lhê lhu? Yhangmoq gi, wó gyo gù za nghut lhê, haû eq rajung za, "Yhangmoq é htê gi, myidàm htoq banshoq má jàm bê nghut ri;

yhangmoq é mungdang pé gi, mingkan htungchyûn hkanmó má jé bê nghut ri."☆

gâ tô ri. ¹⁹ Ngò dum myi kó lé: Israelaq byu pé gi, a sê gyo kô é nghut lhê lhu? Mosheq sângh-hi má taî é gi,

"Byù rahú lhang a nghut bang eq, Ngò, nungmoq lé manôn nhâng râ;

sê gyo nyan a bo é amyù eq, Ngò, nungmoq lé wú nhik-yo nhâng râ nghut lhê."☆

gâ ri. ²⁰ Hau htoq agó, Esai-aq a gyuq a wàm taî é gi,

"Ngo lé a ho é bang gi, Ngo lé myang hô bekô nghut ri;

Ngá hkyô lé a myî é bang lé, Ngò htoq shit bê nghut lhê."☆

gâ ri. ²¹ Nghut kôhlang, Israelaq byu pé eq séng luí, Yhang taî é gi,

"Ngò gi, jìno a gyô é eq ngegáng-htu é byù myû lé, nyí wuí Ngá loq lham mù ji nyi lhê."☆

gâ ri.

11

Israelaq Byu Pé Lé A He-ngik Pyám

¹ Haû mù luí, ngò myi kó lé, Garai Gasang gi, Yhâng é byu pé lé he-ngik pyám bê nghut lhê lhu? Ratsuí lhang a nghut! Ngò yhang le, Israelaq byù myû nghut luí, Abraham é awut ashín eq Ben-yamyin hú mâ é sù nghut lhê. ² Garai Gasang gi, Yhang te sê to gû nghut é, Yhâng

☆ 10:18 Hkya-on 19:4

☆ 10:19 Tarâ Pun 32:21

☆ 10:20 Esai 65:1

☆ 10:21 Esai 65:2

é byu pé lé a he-ngik pyâm é nghut lhê. Eliyaq eq sêng é hkyô Chyúmdang má bo tô é lé, nungmoq a sé kó l hú? Garai Gasâng é hí má, yhang, Israelaq byu pé lé mara hûn é gi, ³ "Yhumsîng ê, yhangmoq gi, Náng é myiqhtoî pé lé sat pyám kô é eq Náng é hkungga gyap pé lé tu lhêng pyâm akô nghut ri; ngò rayuq za myit gyó tô é nghut luî, ngo lé sat râ matú le yhangmoq ho nyi akô nghut ri." ✧ gâ ri. ⁴ Garai Gasang gi, yhang lé, hkâsu ga tû taî é nghut lhê l hú? Haû gi, "Balaq hpara é hí má hkyihput a htuq shî é byù nyhit hkyíng lé, Ngá é matú myhit to lhê." ✧ gâ é nghut lhê. ⁵ Haû eq rajung za, ahkuî gi, jeju yanmai hkyin yù huî é bang za myit gyó tô é nghut lhê. ⁶ Jeju yanmai nghut é nghut le gi, muzó é yanmai a nghut lo; muzó dông ru nghut le gi, jeju gi, jeju a nghut lo.

⁷ Haû nghut jáng, hkâsu l hú? Israelaq byu pé gyai ho shikut kôlhâng, a wó kô é lé, hkyin htoq yù huî é bang kúm gi, wó bekô nghut ri. Góbang gi, myit lhoq htân byî é hui akô nghut ri; ⁸ haû gi,

"Garai Gasang gi, hkû-nyí jé shoq, yhangmoq lé nhikshi jit é woi-nyí lé le, a wó myang é myoqjí lé le, a wó gyô é nohkyap lé le, byî to bê nghut ri." ✧

ga kâ tô é eq rajung za nghut ri. ⁹ Dawiq taî é le,

"Yhangmoq é zangbó gi, yhangmoq é matú, dumzo eq lhaí, myit leqbat jowò eq lató hpuq hkyô dut sháng gaq;

¹⁰ Yhangmoq myoq a wó myâng shoq, myoqjí lhoq chut pyám byî é hui sháng gaq;

yhangmoq é nunghkúng gi, ayang wòlai wun goí nhang é hui sháng gaq." ✧

gâ ri.

✧ 11:3 1 Hko 19:10,14 ✧ 11:4 1 Hko 19:18 ✧ 11:8 Tarâ Pun 29:4

✧ 11:10 Hkya-on 69:22-23

Tûngbaù Pé Lé Hkyi Yu É Hkyô

¹¹ Ngò dum myi kó lé: Israelaq byu pé gi, a wó dum gè râ í leqbat byuq bekô lhú? Ratsuí lháng a nghut! Yhangmoq é tarâ lu lai hkyo é yanmai, yhangmoq lé manôn nhâng râ matú, hkyi yù hkyô gi, tûngbaù pê chyáng jé byuq é nghut lhê. ¹² Nghut kôlhang, yhangmoq é tarâ lu lai hkyô gi, mingkân é matú wó sùt hkyô eq, yhangmoq sum pyâm é hkyô gi, tûngbaù pê é matú wó sùt hkyô dut é nghut jáng, yhangmoq é byíng jup hkyô gi, je riyhang kô é wó sùt hkyô dut râ nghut ri-nhung!

¹³ Nungmoq tûngbaù pé lé ngò taí nyi lhê: ngò gi, tûngbaù pê é lagyo nghut nyi é u má, ngá é hpungmú lé hpautap nyi lhê. ¹⁴ Haù gi, ngá é amyú pé lé manôn myit wó bô nhâng mù, yhangmoq ra-am lé wó hkyi yù râ lé myit myoqbyu é hkyô nghut lhê. ¹⁵ Hkâsu mù gâ le, yhangmoq lé he-ngik pyâm é hkyô gi, mingkân é matú Garai eq buinùm xoq hkyô dut bê nghut jáng, yhangmoq lé dum hap yu é hkyô gi, shi é mai dui toq é dông dut bê a nghut lhi? ¹⁶ Hau htoq agó, sâng-hí ashi dông nhông byí é mún ra-am gi, chyoiyúng é nghut jáng, muk htung gón gi, chyoiyúng é nghut lhê; haù amyit gi, chyoiyúng é nghut jáng, akoq pé le chyoiyúng é nghut lhê.

¹⁷ Haù tsanlun akoq pé* ra-am gi, lhoq hkyui pyâm é hui luí, yosô tsanlun a-nyuq† nghut sù nàng gi, haù pé má xoq é hui mù, haù tsanlun amyit é xù lé bo shuq lom é nghut jáng, ¹⁸ akoq haù pé lé hkâwú tiq pyám kó. Nungmoq haù su kut é nghut jáng, nungmoq gi, haù amyit lé htuq é a nghut é za, amyit haù sheq nungmoq lé htuq é hkyô lé, nungmoq myit sé keq. ¹⁹ Nungmoq kúm gi, "Ngò, haù má xoq é hui râ matú sheq, akoq haù pé gi, lhoq hkyui pyâm é

* 11:17 Tsanlun akoq pé gi, Israelaq byu pé lé taí nau é nghut lhê. † 11:17 Yosô tsanlun a-nyuq gi, tûngbaù pé lé taí nau é nghut lhê.

huí é ru nghut lhê." ga táí râ nghut lhê. ²⁰ Haú su gi, nghut lhê. Nghut kôlhang, yhangmoq gi, a lumjínq é yanmai, lhoq hkyui pyâm é hui kômù, nungmoq kúm gi, lumjínq é yanmai, wó ging tǐng nyi é nghut lhê. Hká gumrong nyì, gyuq kyum nyì keq. ²¹ Hkâsu mù gâ le, Garai Gasang gi, akoq akying pé lé a ha bûn é nghut le gi, nungmoq lé le ha bun râ a nghut.

²² Haú mù luí, Garai Gasâng é shogyo nhikmyin hkyô eq htân htân kut pyâm é hkyô lé, myit wú keq: leqbat é bang lé htân htân kut pyám kôlhang, nungmoq gi, Yhâng é shogyo nhikmyin hkyô má xoq nyi nyi é myháng, nungmoq lé gi, shogyo nhikmyin nyì râ nghut lhê. Haú a nghut jáng, nungmoq le, zân hpyit pyâm é hui râ nghut lhê. ²³ Yhangmoq gi, a lumjínq hkyô lé tô pyám kô é nghut jáng, dum xoq yu é hui kó râ nghut lhê; hkâsu mù gâ le, Garai Gasang gi, yhangmoq lé dum wó xoq yu é Sû nghut lhê. ²⁴ Haí mù gâ le, yosô tsanlun gàm akoq nghut gù nungmoq lé hpyit yû mù, htûng a nghut é dǒng, hô é tsanlun agàm má xoq é nghut le gi, haú akoq akying pé nghut é yhangmoq gi, ó le ó é tsanlun-ngut akying má xoq yu é lé je riyhang hui râ nghut lhê ô!

Israelaq Byu Pé Hkyi Yu É Hui Râ Hkyô

²⁵ Haú mù, gumang wuì ê, nungmoq a nghutbun kó sháng gaq nghû, zau tô é hkyô shí lé, nungmoq a sé dut râ lé, ngò a ô nau é nghut lhê: haú gi, tûngbaù pé wang lo é laké byíng é hkûn jé shoq, Israelaq byu pé ra-am gi, myit lhoq htan é huí é hkyô nghut lhê. ²⁶ Hau htâng sheq, Israelaq amyû banshoq bang hkyi yu é hui râ nghut lhê. Haú gi,

"Hkyi yù Sû gi, Zi-un bùm mai htoq lô râ nghut lhê;
Yhang gi, Garai lé nunghtáng tô pyâm é hkyô lé, Yakup é awut ashín mai huí sêng pyám byi râ nghut lhê.

²⁷ Ngò, yhangmoq é yubak mara lé huí sêng pyám byi jáng, haû gi, yhangmoq lé Ngò byi tô é Ngá é dangshikaq nghut lhê."[☆]

ga kê tô é eq rajung za nghut ri.

²⁸ Haû gabú danglù eq séng luí ga jang, yhangmoq gi, nungmoq é matú gyè nghut akô; nghut kôlhâng, hkyin htoq yû hkyô eq séng luí ga jang, yhangmoq gi, myìng hû é îchýí îwa pê é yanmai, chyitdap é huí akô nghut ri; ²⁹ hkâsu mù gâ le, Garai Gasâng é chyunghuq pé eq Yhang ji yu é hkyô lé gi, wó htaî lhik pyâm é a nghut. ³⁰ Nungmoq gi, Garai Gasâng é jìno a gyô é bang radàm dut wú kô é nghut kôlhâng, yhangmoq jìno a gyô é yanmai, ahkuí kúm, shogyo nhikmyin hkyô wó hkam yù bekô nghut é su, ³¹ ahkuí, yhangmoq gi, nungmoq wó hkam yu é Garai Gasâng é shogyo nhikmyin hkyo é yanmai, shogyo nhikmyin hkyô lé wó hkam yù kó sháng gaq ga, yhangmoq le, ahkuí, jìno a gyo bang dut bekô nghut ri. ³² Hkâsu mù gâ le, Garai Gasang gi, byù lhunglhâng bang lé, shogyo nhikmyin hkyô wó tûn shit shoq ga, lhunglhâng bang lé, jìno a gyo hkyo é shúm dut nhang to bê nghut ri.

Hkya-on Kungtôn Dang

³³ Ô! Garai Gasâng é agùn agó é sùt nghut é, hpaqchyí byéng-yá eq nyan hpaqchyí gi, hkâ-í yhang nik ri-nhung!

Yhâng é tarâ jéyáng hkyô gi, ung sê jung a nghut nhung!
Yhang kut é hkyô pé gi, hkâ-í yhang ho htoq wú jung nghut ri-nhung!

³⁴ "Haû Yhumsing é myit lé, ó yuq wá ung sê lhê lhú? Yhâng é hpaqchyí byi sù gi, ó yuq wá dut wú é lhú?"[☆]
gâ ri.

³⁵ "Garai Gasâng êq jeju dum tau byi râ dut shoq, ó yuq wá,
Garai Gasang lé byî wú é lhú?"[✧]
gâ ri.

³⁶ Hkâsu mù gâ le, joq mijog gi, Yhâng chyáng mai nghut
mù, Yhang đông mai nghut luî,
Yhâng é matú chyat nghut ri. Haû hpungwup
shing kang gi,
Yhâng chyáng ahtum abyuq ru joq nyî sháng gaq ô! Amen.

12

Dui É Hkungga Pé Dut Râ Hkyô

¹ Haû mù luî, gumang wuî ê, nungmoq é gungdu pé
lé, Garai Gasang myit nguî ô nau é eq chyoiyúng é, dui é
hkgungga đông nhông byi keq nghû, Garai Gasâng é shogyo
nhikmyin hkyô mai, ngò, nungmoq lé wum byî kat lhê.
Haû gi, woi-nyî hkyô đông nungmoq noqkuq dojaú é hkyô
nghut lhê. ² Mingkan shí lhûm é sâmlai đông a cháng lo
é za, myit sik wó yû râ đông nungmoq é a-kyang lé htaî
pyám byi nhâng keq. Haú hkûn sheq, Garai Gasâng é ge
é, myit nguî é eq gumjup é ô naù hkyô lé, nungmoq wó
chyâm, wó sê gàm hkoq yû kó râ nghut lhê.

³ Hkâsu mù gâ le, ngo lé byî tô é jeju yanmai, nungmoq
yuq hkgangmó lé ngò taí kôlé: nungmoq gi, yhumsing gùng
lé lai shoq a nghutbûn é za, ó le ó lé, Garai Gasâng êq
lumjúng myit tsing gàm byî to bê eq rajung za, myit yù
gíng é í za myit yù keq. ⁴ Nga-nhúng yuq hkgangmó é
gungdu ralhum má gi, gungdu showui showang pé myo
myo bo é nghut luî, gungdu showui showang haú pé
banshoq gi, jai chûng jang a pung é nghut lhê. ⁵ Haû
eq rajung za, myo myo nghut é nga-nhúng le, Hkrisduq
má gungdu ralhum za dut luî, yuq hkgangmó gi, rayuq eq

[✧] 11:35 Yob 41:11

rayuq gungsho sêng lhâm é bang chyat nghut lhê. ⁶ Nga-nhúng lé byî tô é jeju yanmai, nga-nhúng wó é chyunghuq gi, gotû tô nghut lhê. Byù rayuq é chyunghuq gi, myiqhtoi htoí é nghut jáng, yhâng é lumjínng hkyô eq rajung za htoi sháng gaq; ⁷ dojaú é nghut jáng, dojaú sháng gaq; mhoq kyô é nghut jáng, mhoq kyo sháng gaq; ⁸ myit wum byî é nghut jáng, myit wum byi sháng gaq; ra châ é bang lé garúm byî é nghut jáng, a ha bûn é za byi sháng gaq; shuí u é nghut jáng, lumluq tung shuí u sháng gaq; shogyo nhikmyin hkyô shit é nghut jáng, gabú myit eq kut sháng gaq.

Chyitdap Myit

⁹ Chyitdap myit má gegùn labyoq a ge bò. Agè ashop dut é lé, nhik noq pyám keq; ge é lé, myit tuí nyî keq. ¹⁰ Rayuq eq rayuq, gumang chyitdap myit mai lhumzui lhum keq. Rayuq eq rayuq, yhumsing gùng htoq je hpautap lhum keq. ¹¹ Myit zuq hkyô má, hkâ-nhám le wum a lhoq shôm é za, nungmoq é woi-nyî hkyô má myit toq nyî mù, haû Yhumsîng lé dojaú nyî keq. ¹² Myit myoqbyù hkyô má gabú keq; wuîhke hkyô má hkam jan keq; kyûdung hkyô má lhumzui keq. ¹³ Ra châ tô é Garai Gasâng é byu pé lé gàm byi keq. Bínng hkulum é lé rago kut keq.

¹⁴ Nungmoq lé zing-rî é bang lé shimân byi keq; shimân byi keq, hkâ-nhing kó. ¹⁵ Gabú é bang eq rahá bo gabú keq; yón é bang eq rahá bo yón keq. ¹⁶ Rayuq eq rayuq byîn hpyé gohut huî nyî keq. A nghutbûn é za, nyî yap hkyô nyhâm bang eq zùm yap keq. Hpaqchyî bo é sù su hkâ-myit ngàm kó.

¹⁷ Ó yuq lé le, agè ashop é yanmai, agè ashop é dông lató hkâhpuq kó. Yuq hkanngmó é myoq hí má ge é lé kut râ rago myit keq. ¹⁸ Wó dut é nghut jáng, nungmoq wó dut é í, yuq hkanngmó eq nguínngón shoq nyî keq. ¹⁹ Ngá é

buinùm wuì ê, lató a hpuq é za, Garai Gasâng é nhikmo-yo hkyô lé sheq láng nyî keq. Hkâsu mù gâ le, "Ngò sheq lató hpuq râ sù nghut lhê; ngò lató hpuq râ." ☆ ga, haû Yhumsîng taì ri ga kê tô ri. ²⁰ Haû mù,

"Nungmoq lé gyè kut sù zòmút é nghut le gi, byi tso keq; yhang wuìshit é nghut le gi, rajung jung byi huq keq.

Haú dông kut jáng, nàng, yhâng é ulhum htoq má gyúng é myigye bum to byî é nghut lhê." ☆

ga le kê tô ri. ²¹ Agè ashop é gi, nungmoq lé a ung pyám sháng gaq, ge é hkyo èq agè ashop é lé ung pyám keq.

13

Ahkáng Ayá Wó Bàng Ô Má Nyi Râ É Hkyô

¹ Yuq hkgámó gi, up é ahkáng ayá wó bàng é a-ô má nyi ra râ nghut lhê; hkâsu mù gâ le, Garai Gasâng chyáng mai za a nghut le gi, up é ahkáng ayá joq é a nghut. Joq tô é ahkáng ayá pé gi, Garai Gasâng èq byî tô é chyat nghut lhê. ² Hau é yanmai, up é ahkáng ayá lé gumlau toq é sù gi, Garai Gasang byî tô é up é ahkáng ayá lé gumlau toq é sù nghut ri; haû su kut é bang gi, tarâ jéyáng é hui zo râ hkyô lé ho yù nyi é bang nghut akô. ³ Hkâsu mù gâ le, uphgang é bang gi, ge é hkyô kut bàng é matú gyuq nán hpo a dut é za, shut shaî hkyô kut bàng é matú sheq dut é ru nghut lhê. Up é ahkáng wó sù lé gyuq é mai lut nau lhê a nghut lhi? Haû jáng, ge é hkyô kut aq, haú hkûn, yhang, nang lé hkyon râ nghut lhê. ⁴ Hkâsu mù gâ le, yhang gi, náng é matú ge é akyû kut byi râ nghut é, Garai Gasâng é dui-nhâng zoshâng nghut lhê. Nghut kôlhang, nàng, shut shaî hkyô kut é nghut le gi, gyuq nán nyi aq; haî mù gâ le, yhang gi, sâm lé ajè wun tô é a nghut. Yhang gi, Garai Gasâng

☆ 12:19 Tarâ Pun 32:35 ☆ 12:20 Sânghkyang 25:21-22

é dui-nhâng zoshâng nghut mù, shut shaî hkyô kut sù lé dam byi râ matú nhikmo-yo Su é gunglik nghut lâ. ⁵ Haû mù luí, dam byi râ lé chiq é yanmai za a nghut, yhumsîng nhik bô râ é yanmai le, haû up é ahkáng ayá wó bâng é a-ô má nyi râ dut lâ.

⁶ Nungmoq hkansê kat râ é gi, hau é yanmai le nghut lâ; hkâsu mù gâ le, haû up é ahkáng ayá wó bang gi, Garai Gasâng é dui-nhâng zoshâng wui nghut lâ mù, uphkanq é mù lé, ahkýing byíng shoq wùn waq nyi akô nghut ri. ⁷ Yuq hkanqmó lé byi âng é eq rajung za byi keq: hkansê kat byi ang sù lé gi, hkansê kat byi keq; kang kat byi ang sù lé gi, kang kat byi keq; gyuq kyum ang sù lé gi, gyuq kyum keq; hkungga ang sù lé gi, hkungga keq.

Rayuq Eq Rayuq Chyitdap Lhum Râ Hkyô

⁸ Rayuq eq rayuq chyitdap lhûm é chyîn mai lai luí, hai chyîn le hkâdap lhum kó; hkâsu mù gâ le, góyuq lé chyitdap é sù gi, haû jep é tarâ lé lhoq dik bê sù nghut ri. ⁹ "Su-myi sulàng lú hkyô hkâkut, " "Byù hkâsat, " "Hkâhkau, " "Hkâ-myoqnoq, "☆ gâ tô é hkunmó pé eq gotû hkunmó haî nghut nghut, "Náng gûng lé náng chyitdap é su, náng é chyangnâm mâ é bang lé le chyitdap aq."☆ gâ é tarâ má lo jup to bê nghut lâ. ¹⁰ Chyitdap myit gi, chyangnâm mâ é byù lé a ge é haî le a kut é nghut lâ. Haû mù luí, chyitdap myit gi, haû jep é tarâ lé lhoq dik é hkyô nghut ri.

¹¹ Haû mù, ahkuí lâ é ahkýing yàm-yoq lé sê gyo luí, haû hkyô lé kut keq. Nungmoq yhup mui é mai bûn gying râ ahkýing jé bê; haî mù gâ le, nga-nhûng é hkyi yù hkyô gi, lumjîng hi é hkun lâ htoq má ahkuí je chyáng bê nghut ri. ¹² Haû myín ahkýing gi, lai byuq ló râ za nghut bê; nyí ahkýing gi, jé lô berâ nghut lâ. Haû mù luí, mauchut é

☆ 13:9 Htoq Ló 20:13-15 ☆ 13:9 Nhong 19:18

muzó lé tô pyám mù, maubó é gyehking lé wut to sháng. ¹³ Ye lhaî é eq shuq wut é, ashop é dông gungsho zùm yap é eq shut é dông nyì zô lhúm nau é myit bo é, mabyoq jishùm htoq é eq manon é pé a kut é za, nyí-káng lhê su, ge é a-kyang dông nyì yap sháng. ¹⁴ Hau htoq agó, Yhumsîng Yesuq Hkrisduq lé, mebu su wut to keq; yubak gungsho ô nau é dông lhoq dik râ matú hkâ-myit kó.

14

Gumang Wuì Lé A Jéyáng Râ Hkyô

¹ Lumjîng myit má wum nyhóm sù lé, myíng myo nhô zâ é hkyô pé lé a jéyáng byî é za hap yù keq. ² Byù rayuq é lumjîng myit gi, jung hkanqmó zô ri; nghut kôlhang, lumjîng myit nyhóm sù gotû rayuq gi, mhan-haq hpoqnoq za zô ri. ³ Jung hkanqmó zo sù gi, a zo sù lé a ge wú tiq pyám; jung hkanq jung mó a zo sù gi, zo sù lé mara a ge byi; hkâsu mù gâ le, Garai Gasang gi, yhang lé hap yu to bê nghut ri. ⁴ Nàng gi, ó yuq wá nghut mù, góyuq é dui-nhâng zoshâng lé jéyáng lhê lhú? Yhang, yap ging kôlhang, leqbat kôlhang, yhâng é yhumsing myit za nghut lhê. Yhang gi, wó yap ging râ nghut lhê; hkâsu mù gâ le, haû Yhumsîng gi, yhang lé wó yap ging nhâng Sù nghut lhê.

⁵ Rayuq myit é gi, buinyì ra-nyí gi, gó nyí htoq je ge lhê gâ ri; dum rayuq myit é gi, nyí wuî rajung za nghut lhê gâ ri. Yuq hkanqmó gi, yhumsîng myit yu é lé a úng-âng nyì sháng gaq. ⁶ Buinyì ra-nyí lé, ahkyak lhê ga myit yù sù gi, haû Yhumsing é matú kut é nghut ri. Zô é sù gi, Garai Gasang lé jeju hkya-ôn é yanmai, haû Yhumsîng lé bun luî zô nyi ri; a zo sù le, haû Yhumsîng lé bun luî Garai Gasang lé jeju hkya-ôn nyi ri. ⁷ Hkâsu mù gâ le, nga-nhúng ó yuq nghut kôle, yhumsing matú za asak dui é a nghut; ó yuq nghut kôle, yhumsing matú za shi é a nghut.

⁸ Nga-nhúng asak dui nyi le gi, haû Yhumsing é matú dui é ru nghut lhê; nga-nhúng shi byuq le gi, haû Yhumsing é matú shi é ru nghut lhê. Haû mù, asak dui nyi kôlhang, shi byuq kôlhang, nga-nhúng gi, haû Yhumsing eq sêng é bang nghut lhê.

⁹ Haû su mù, Hkrisduq gi, shi byuq bang eq asak dui bâng é Yhumsing dut sháng gaq ga, shí hkám mù dum dui toq é nghut lhê. ¹⁰ Haû mù, nàng gi, haû mù náng é gumang hpó lé jéyáng nyi lhê lú? Haû mù náng é gumang hpó lé wú tiq nyi lhê lú? Nga-nhúng lhunglhang bang gi, Garai Gasâng é tarâ jéyáng tanghkuq hí má yap râ bang chyat nghut lhê. ¹¹ Hkâsu mù gâ le,

"Haû Yhumsing gi, 'Ngò rû dui nyi é eq rajung za, Ngá é hí má hkyihput hkangmó htuq râ nghut lhê;

Garai Gasang lé, shô hkangmó eq yín yû kó râ nghut lhê.' ga tâi ri."☆

ga kê tô ri. ¹² Haû mù luî, nga-nhúng yuq hkangmó gi, yhumsing kut lai lo é hkyô lé, Garai Gasâng chyáng shit ra râ nghut lhê.

¹³ Haû nghut mù, nga-nhúng gi, rayuq eq rayuq tarâ jéyáng lhûm é hkyô lé tô pyám sháng. Ó yuq nghut kôlhang, yhumsing é gumâng é hkyowuî má, myit leqbat jowò eq htung htê jowò a to byi râ matú, myit sidiq keq.

¹⁴ Haû Yhumsing Yesuq má nghut nyi é sû ngò gi, haû jung zoshuq nghut kôlhang, yhang baú yhang a sansêng a dut é hkyô lé, hkyak wó sé luî, jing nyi lhê. Nghut kôlhang, ó yuq le, rajung jung lé a sansêng ga myit yu é nghut jáng, yhang é matú, zè haû gi, a sansêng é nghut lhê. ¹⁵ Nàng zô é zoshuq yanmai, náng é gumang hpó myit a ngón é nghut le gi, nàng, chyitdap myit mai sô nyi é sû a nghut lo. Hkrisduq shí hkám byi bê sû nghut é, náng é gumang hpó lé, nàng zoshuq é dông mai hkâlhoq hten pyám. ¹⁶ Nàng,

☆ 14:11 Esai 45:23

ge ri nghû myit yu é hkyô lé, agè ashop é đông hkâtaî pyám nhâng. ¹⁷ Hkâsu mù gâ le, Garai Gasâng é mingdán gi, zo zo shuq shuq hkyô a nghut é za, dingmán hkyô, nguingón hkyô eq Chyoiyúng Woi-nyí má gabú é hkyô ru nghut lhê. ¹⁸ Haî mù gâ le, shí hkyô đông mai Hkrisduq lé dojaú é sủ gi, Garai Gasang ô nau é sủ eq byu pê èq hkya-ôn é hui sủ nghut ri.

¹⁹ Haû mù luí, nguingón hkyô má nyi râ eq, rayuq eq rayuq wum byi lhum râ hkyô lé, shikut nyi keq. ²⁰ Zoshuq é yanmai, Garai Gasâng é muzó lé hkâlhoq hten pyám. Zoshuq lhunglhang gi, sansêng é chyat nghut lhê; nghut kôlhang, góyuq lé myit leqbat nhang é jung lé zô é sủ gi, shut é nghut lhê. ²¹ Tsibiyiq wing shuq é eq sho zô é hkyô má nghut kôlhang, gotú haí jung kut é nghut kôlhang, náng é gumang hpó lé myit leqbat nhang é nghut le gi, a kut le je ge lhê.

²² Haû mù, haú pé eq séng luí, nàng lumjíng é haî nghut kôle, nàng eq Garai Gasâng gyoro má za joq nyi sháng gaq. Yhumsíng ge lhê gâ é èq, yhumsing gùng yhumsíng mara byi jang a joq é sủ gi, hkungsô wó nyi ri. ²³ Nghut kôlhang, úng-âng é myit èq zô é nghut le gi, mara byi é hui ri, haî mù gâ le, yhang zô é gi, lumjíng myit mai a nghut; lumjíng myit mai a kut é haî nghut kôlhang, mara nghut ri.

15

Góyuq Lé Myit Ngón Nhâng Râ Hkyô

¹ Lumjíng hkyô má wum-o bo é nga-nhúng gi, yhum-síng myit ngón râ hkyô lé a ho é za, wum-o a bò bâng é wum nyhóm hkyô lé, hkam jan byi nyi râ dut lhê. ² Nga-nhúng yuq hkangmó gi, yhumsing é chyangnâm mâ é su é ge é hkyô dut râ matú, yhang wó kô myhang lò shoq, yhang lé lhoq ngón byi nyi sháng. ³ Hkâsu mù gâ le, Hkrisduq lhang gi, Yhânggùng yhang lhoq ngón é a nghut;

haû gi, "Nang lé rhoi bâng é dang gi, Ngá chyáng gyó ke bê nghut ri." ✠ ga, kê tô é eq rajung za nghut ri. ⁴ Hkâsu mù gâ le, laí lò bê hkûn kê tô é lhunglhang gi, nga-nhúng lé mhoq byi râ matú chyat kê tô é nghut lhê; haû gi, Chyúmdang mâ é hkam jan hkyô eq myit wum byi hkyô dông mai, nga-nhúng myit myoqbyù hkyô wó râ matú nghut lhê.

⁵ Haû hkam jan hkyô eq myit wum byi hkyô lé byî é Garai Gasang gi, nungmoq, Hkrisduq Yesuq é htâng châng nyi é u lé, nungmoq yhangchang rading ralhum za dut é woi-nyí byi sháng gaq; ⁶ haû jáng sheq, nungmoq gi, i-myt rahkat eq nhut htê ralhum èq za, nga-nhúng é Yhumsîng Yesuq Hkrisduq é Yhângwa nghut Sû, Garai Gasang lé, wó hkyá-on kungtôn kó râ nghut lhê.

⁷ Haû mù luí, Hkrisduq gi, nungmoq lé hap yù bê é eq rajung za, Garai Gasâng é hpungwup shingkang lé lhoq htoq shit râ matú, nungmoq le, rayuq eq rayuq hap yu lhum keq. ⁸ Hkâsu mù gâ le, ngò, nungmoq lé tái kôlé, haû myìng hû é îchyí îwâ pé lé byî tô é danggidìq pé lé lhoq gíng râ matú, Hkrisduq gi, Garai Gasâng é tengmán hkyo é malaî, Yudaq byu pê é dui-nhâng zoshâng dut bê nghut ri. ⁹ Haû mù, Garai Gasâng é shogyo nhikmyin hkyo é yanmai, haû tûngbaù pé, Garai Gasang lé wó hkyá-on kungtôn kó râ nghut lhê. Haú hkyô gi,

"Haû mù luí, tûngbaù pê chyáng má, Nang lé, ngò hkyá-on râ nghut lhê;

Náng é myìng lé, ngò hkyá-on mahkôn râ nghut lhê." ✠

ga kê tô é eq rajung za nghut ri. ¹⁰ Dum,

"Tûngbaù pé ê, Yhâng é byu pé eq rahá gabú nyì keq." ✠ gâ tô ri. ¹¹ Dum,

✠ 15:3 Hkyá-on 69:9 ✠ 15:9 Hkyá-on 18:49 ✠ 15:10 Hkyá-on 32:43

"Nungmoq tûngbaù pé lhunglhang bang ê, haù Yhumsîng lé hkya-on keq, byù myù lhunglhang bang ê, Yhang lé hkya-on mahkôn hkôn keq."☆

gâ tô ashî nghut ri. ¹² Hau htoq agó, Esai-aq taì é gi, "Yese é Amyit gi, yuq htoq lô luî, Yhang gi, byù myù chângjup é ahtoq má up râ sù nghut lhê; tûngbaù pé gi, Yhang má myit myoqbyù kó râ nghut lhê."☆

gâ ri.

¹³ Haù myit myoqbyù hkyô byî é Garai Gasang gi, Yhang lé lumhkau nyi é bang nungmoq lé, gabú hkyô banshoq eq nuingón hkyô lhoq pyíng byi sháng gaq; haù jáng sheq, nungmoq gi, Chyoiyúng Woi-nyí é wum-o a-tsâm eq, myit myoqbyù hkyô wó byíng mui nyi kó râ nghut lhê.

A Gyuq A Wam É Za, Poluq Laiká Kâ É Hkyô

¹⁴ Ngá é gumang wuì ê, nungmoq gi, ge é hkyô byíng jup é bang, hpaqchyî má gumjup é bang, rayuq eq rayuq mhoqshit lhùm é má kûng é bang nghut é lé, ngá gûng ngò yhang hkyak lumjínghê. ¹⁵ Ngò gi, nungmoq lé dum lhoq pûn é dông, ahkyak é pé ra-am lé a gyuq a wàm kâ kat bê nghut lhê. ¹⁶ Hkâsu mù gâ le, tûngbaù pé gi, Chyoiyúng Woi-nyí dông mai lhoq sân-yúng é hui luî, Garai Gasâng eq hap yù gíng é hkungga wó dut kó sháng gaq ga, Garai Gasâng é gabú danglù lé hkô râ hkyangjong é wò dông, tûngbaù pê chyáng, Hkrisduq Yesuq é hpungmû wùn sù dut râ matú, Garai Gasang, ngo lé jeju byî é yanmai nghut lhê.

¹⁷ Haù mù luî, ngò gi, Garai Gasang lé dojaù é hkyô eq séng luî, Hkrisduq Yesuq má nghutbûn nyi lhê. ¹⁸ Ngò gi, ngò taì é eq zui saì é muzó dông le, haù Woi-nyí é a-tsâm chûng mù, kumlhá pé eq laklaí kumlhá pé dông

le, tûngbàu pé lé, Garai Gasâng é jìno gyo shoq shuî û é má, ngo lé Hkrisduq nhang é muzó hkyô lé taí é mai lai luí, gotû haí lé le wám taí é a nghut. ¹⁹ Haû mù luí, ngò gi, Yerusalem wà mó mai Ilurihkam mau jé shoq é hkyô awui ayàm jàm shoq, Hkrisduq é gabú danglù lé hko kyo bê nghut lhê. ²⁰ Ngò hkâ-nhám le myit tuí nyi é hkyô gi, góyuq hi tô é apûn awang má dum a puq saí pyâm é za, Hkrisduq lé a sé shi é jowò má gabú danglù hko kyo râ hkyô nghut lhê. ²¹ Haû gi,

"Yhâng é hkyô lé, taí kyô é a hui shî é bang, myàng kó râ nghut luí,

a wó gyô wú é bang, sê gyo kó râ nghut lhê."☆

ga kê tô é eq rajung za nghut ri. ²² Haû mù luí, ngò, nungmoq chyáng lé jé râ lé, anum num hkyikyo luqlhum dut nyi é gi, muzó hau é yanmai nghut lhê.

Romaq Myuq Lé Lô Kum Râ Sôn É Hkyô

²³ Nghut kôlhang, ahkuî gi, shí mau pé má ngò zui saí râ jowò a joq lô é nghut mù, nungmoq lé myàng nau nyi é zanwut myo myo nghut bê eq rajung za, ²⁴ ngò, Sipin ming shut lô é hkûn, nungmoq chyáng wàng râ sôn tô lhê. Ngò gi, lai lô é hkûn, nungmoq lé lò sô kum mù, nungmoq eq rayoq zo zùm yap ngón é htâng má sheq, ngá é hkyowui matú, nungmoq haû mai htuqbang kat râ lé, ngò myoqbyu tô lhê. ²⁵ Ahkuî, ngò kúm gi, Yerusalem wà mó mâ é sân-yúng bang lé dojaú râ matú, haú wâ shut e lô é hkyolat má nghut nyi lhê. ²⁶ Hkâsu mù gâ le, Makedoni eq Ahkaia mau mâ é bang gi, Yerusalem wà mó mâ é sân-yúng bâng chyáng mâ é myùng bâng é matú, garúm chyunghuq hkyui tsing nau bùm bekô nghut ri. ²⁷ Yhangmoq gi, haû su kut nau bùm bekô nghut ri, gè gè ga jáng, haû gi, yhangmoq chyîn dap tô é đông ru nghut

☆ 15:21 Esai 52:15

lhê. Hkâsu mù gâ le, haû Yudaq byu pê é woi-nyí eq sêng é shimân jeju lé, tûngbaù pé bo hkam yù bê nghut le gi, yhangmoq é sutzè shimân jeju lé, Yudaq byu pé eq chôm chûng râ chyîn dap tô é dông nghut lhê. ²⁸ Haû mù luî, ngò gi, muzó shí lhum ban kut mù, garúm chyunghuq shí lé, yhangmoq wó hap yù bê lé hkyak sê é htâng má, Sipin ming shut ló râ nghut mù, lai ló uchyang, nungmoq chyáng lé sô kum râ nghut lhê. ²⁹ Ngò gi, nungmoq chyáng lé jé é hkûn, nungmoq é matú Hkrisduq é shimân jeju byíng jup é èq jé lé râ nghut é lé, ngò sê lhê.

³⁰ Gumang wuî ê, ngá é matú Garai Gasâng chyáng kyûdung byí é dông, ngò wum kat yhang shikut é hkyô má nungmoq bo wàng lòm râ matú, nga-nhûng é Yhumsîng Yesuq Hkrisduq eq Woi-nyí é chyitdap myit é yanmai, ngò, nungmoq lé wum tái tsuq kat lhê. ³¹ Yuda mau mâ é a lumjîng bâng chyáng mai, ngò hkyi yu é wó hui luî, Yerusalem wà mó má ngò wùn waq é muzó lé, haû mâ é sân-yúng bang hap yù gíng é wó dut râ matú kyû bo dung byi keq. ³² Haû jáng sheq, ngò gi, Garai Gasang ô nau é dông mai, gabú myit èq nungmoq chyáng wó jé lé mù, nungmoq eq rahá wum-o wó yû râ nghut lhê. ³³ Haû nguîngón hkyo é Garai Gasang gi, nungmoq banshoq bang eq rahá rû nyi nyi sháng gaq ô. Amen.

16

Shi-kyám Dang

¹ Ngò gi, Kenhkrea noqkuq hpúng mâ é hpungtê, nga-nhûng é gu-nhá Hpobe lé, nungmoq chyáng shichyen byí kat lhê. ² Nungmoq gi, sân-yúng bang kut gíng é eq rajung za, haû Yhumsîng má yhang lé hap yù luî, yhang râ tô é hkyô haî nghut kôle, yhang lé htuqbang keq. Hkâsu mù gâ le, yhang gi, byù myo myo lé le, ngo lé le, gyai yhang garúm lai bê sù nghut lhê.

³ Hkrisduq Yesuq má ngò eq mû wùn luzúm nhik nghut é, Priskila eq Akula lé bo shi-kyám byi keq. ⁴ Yhangnhik gi, ngá é asak é matú, yhangnhik é asak sum râ í yhang dut wú kô é nghut mù, ngò za a nghut, tûngbaù pê é noqkuq hpúng pé banshoq le, yhangnhik lé jeju bûn lhê.

⁵ Yhangnhik é yhûm má chôm huí zup é noqkuq hpúng lé le, bo shi-kyám byi keq.

Asia mau má, Hkrisduq lé sâng-hi lumjínq wang lo é, ngò chyitdap é Epanetu lé bo shi-kyám byi keq.

⁶ Nungmoq é matú gyai yhang shikut wú bê sù nghut é Mariq lé bo shi-kyám byi keq.

⁷ Ngò eq rahá htóng lúng wú bê nghut é, ngá é buinùm, Androniku eq Yunia nhik lé bo shi-kyám byi keq. Yhangnhik gi, lagyô pé má myoqdong wó su nhik nghut é htoq agó, ngá é hí má, Hkrisduq má ngò a nyí shi le nyí bê sù nhik nghut akô.

⁸ Haù Yhumsîng má, ngò chyitdap é sù, Ampliatu lé bo shi-kyám byi keq.

⁹ Hkrisduq má, ngamoq é mû zui luzúm nghut é Orban eq ngá é chyitdap luzúm Staku lé, bo shi-kyám byi keq.

¹⁰ Hkrisduq má chyam é hui mù, wó lûm bê sù, Apele lé bo shi-kyám byi keq.

Aristobulu eq sêng é yhumbyù wuì lé bo shi-kyám byi keq.

¹¹ Ngá é buinùm Herudion lé bo shi-kyám byi keq.

Haù Yhumsîng má nghut nyí bê bang, Narkiso é yhumbyù wuì lé bo shi-kyám byi keq.

¹² Haù Yhumsîng má mû zui shikut é myiwê nhik, Truhpena eq Truhposa lé bo shi-kyám byi keq.

Haù Yhumsîng má mû zui gyai yhang shikut é myiwe góyuq, ngá é chyitdap luzúm Persi lé bo shi-kyám byi keq.

¹³ Haû Yhumsîng má hkyin yu é hui bê sù, Ruhpu lé le, ngá nu dông nghut wú bê nghut é Ruhpû é yhângnu lé le, bo shi-kyám byi keq.

¹⁴ Asunkritu, Hpelegon, Herme, Patroba, Herma eq yhangmoq eq rahá nyi é gumang wuì lé, bo shi-kyám byi keq.

¹⁵ Hpilologu, Yulia, Nerea eq yhâng é nhammó eq, Olumpa, yhangmoq eq rahá nyi é sân-yúng bang banshoq lé, bo shi-kyám byi keq.

¹⁶ Rayuq eq rayuq, chyoiyúng bopuq é èq shi-kyâm lhum keq.

Hkrisduq é noqkuq hpúng pé banshoq gi, nungmoq lé shi-kyám dang sang kat akô nghut ri.

¹⁷ Gumang wuì ê, nungmoq é lumjíng hkyô má, nungmoq mhoq hkam yù bê nghut é mhoqshit hkyô eq shai lhúm é, gam hkoq hkyô pé eq myit leqbat hkyô pé lhoq htoq é bang lé sidiq keq nghû, wum taì tsuq kat lhê. Yhangmoq lé koi pyám keq. ¹⁸ Hkâsu mù gâ le, haû sù é bang gi, nga-nhûng é Yhumsîng Hkrisduq lé dojaú é bang a nghut é za, yhumsing é wamdaû matú dojaú é bang nghut akô. Yhangmoq gi, myit nú-nhâm é bang lé, dang ngón dang nguì dông mhaú zô akô nghut ri. ¹⁹ Nungmoq, jìno gyo kô é hkyô lé, yuq hkangmó wó gyo bê nghut ri; haû mù, ngò gi, nungmoq é matú gyai yhang gabú nyi lhê; nghut kôlhâng, ge é hkyô eq séng luí gi, nungmoq hpaqchyî bò mù, agè ashop hkyô eq séng luí gi, nungmoq a bo lòm râ lé, ngò ô nau ri.

²⁰ Nguingón hkyo é Garai Gasang gi, a myáng má, nungmoq é hkyiwa ô má Tsadán lé nang pyeq pyám râ nghut lhê.

Nga-nhûng é Yhumsîng Yesuq é jeju gi, nungmoq eq rahá nghut nyí sháng gaq ô.

²¹ Ngá é mû zui luzúm Timohti gi, nungmoq lé shi-kyám dang sang kat ri; haû eq rajung za, ngá é buinùm wùi Luki, Yason eq Sosipata pé le, shi-kyám dang sang kat akô nghut ri.

²² Laiká shî lé bo ká sù ngò Tertiu gi, haû Yhumsîng má nungmoq lé shi-kyám kat lhê.

²³ Ngo lé le, noqkuq hpúng gón lé le, bíng hkulum é sù Ge-u gi, nungmoq lé shi-kyám dang sang kat ri.

Haû wa mâ é ngùnzui sù Erastu eq nga-nhûng é gumang hpó Kuartu gi, nungmoq lé shi-kyám dang sang kat akô. ²⁴ Nga-nhûng é Yhumsîng Yesuq Hkrisduq é jeju gi, nungmoq lhunglhâng bang eq rahá nghut nyî sháng gaq. Amen.*

²⁵ Byù myû chângjup bang lumjîng luî, Yhang é jîno gyo sháng gaq ga, a-nham pyat mai haq tô é hui kôlhang, ²⁶ ahkuî, ahtum abyuq é Garai Gasâng é hkunmó é yanmai, myiqhtoi laiká pé dông hpông shit é eq sé nhâng bê nghut é, sê gyo wuî é hkyo é shing-rán má cháng luî, ngá é gabú danglù eq Yesuq Hkrisduq é hkyô taî pyo é dông, nungmoq lé wó lhoq ging tíng byî é, ²⁷ rayuq za é hpaqchyî bo sù Garai Gasâng chyáng, Yesuq Hkrisduq dông mai, hpungwup shing kang gi, ahtum abyuq ru joq nyî sháng gaq ô! Amen.

* 16:24 Chyúmding ra-am má chyúmbun 24 shî a bo é nghut lhê.

Chyoiyúng chyumlaiká: dangshikaq asik; Zaiwa New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Updates
eBible.org

PDF generated using Haiola and XeLaTeX on 23 Oct 2018 from source files dated 23 Oct 2018

23f9fc55-a8a4-59ef-9513-707ec336b0ee